



# 澳門特別行政區 立法會會刊

## DIÁRIO DA ASSEMBLEIA LEGISLATIVA DA REGIÃO ADMINISTRATIVA ESPECIAL DE MACAU

第四屆立法會

第四立法會期（二零一二—二零一三）

第一組

第 IV-101 期

IV LEGISLATURA

4.ª SESSÃO LEGISLATIVA (2012-2013)

I Série

N.º IV-101

日期：二零一三年四月二十五日

開始時間：下午三時正

結束時間：下午六時正

地點：澳門南灣湖畔立法會前地立法會大樓全體會議廳

主席：劉焯華

副主席：賀一誠

第一秘書：崔世昌

第二秘書：高開賢

出席議員：劉焯華、崔世昌、高開賢、馮志強、關翠杏、  
歐安利、吳國昌、張立群、徐偉坤、陳澤武、  
鄭志強、區錦新、黃顯輝、吳在權、高天賜、  
崔世平、梁安琪、陳明金、李從正、何少金、  
劉永誠、林香生、麥瑞權、陳偉智、蕭志偉、  
何潤生、陳美儀、唐曉晴。

缺席議員：賀一誠。

列席者：行政長官崔世安

行政法務司司長陳麗敏

經濟財政司司長譚伯源

保安司司長張國華

社會文化司司長張裕

運輸工務司司長劉仕堯

廉政專員馮文莊

審計署審計長何永安

警察總局局長白英偉

行政長官辦公室主任譚俊榮

行政法務司司長辦公室主任張翠玲

經濟財政司司長辦公室主任陸潔嫻

保安司司長辦公室主任黃傳發

社會文化司司長辦公室主任張素梅

運輸工務司司長辦公室主任黃振東

廉政專員辦公室主任沈偉強

審計署審計長辦公室主任何慧卿

行政會委員梁慶庭

行政會委員廖澤雲

行政會委員馬有禮

行政會委員梁維特

行政會委員何雪卿

行政會委員黃如楷

行政長官私人助理譚嘉華

**議程：**議員就政府施政及社會問題向行政長官提問及行政長官  
回答有關問題。

**簡要：**行政長官就政府施政及社會問題的有關提問逐一回答。

**會議內容：**

**主席：**行政長官閣下，各位官員，各位議員，各位

傳播界的朋友：

午安。

現在我哋開會。今日嘅議程獨一項，就係行政長官列席立法會會議，答覆議員嘅提問。我哋嘅會議安排到六點鐘結束，但係亦同行政長官溝通好，我哋直至第一輪嘅提問結束之後先至結束我哋嘅會議，即係每位議員都有一次，起碼有一次的提問同埋答覆嘅機會。到四點一刻我哋會暫停會議，四點四十五分繼續我哋會議。咁我哋嘅答問大會現在開始，首先請陳明金議員發言。

**陳明金：**多謝主席。

行政長官閣下：

衣食住行關乎到民生。今年第一季，本地嘅通脹率係 6.11%，明顯高於鄰近地區，居民日常生活嘅消費物價持續走高，生活負擔日益加重。研究室已經公開表示，澳門嘅通脹問題，主要係由本地因素所造成。

上個月 27 日，房屋局開啟經屋一房嘅單位申請，至本月 10 日，已經派出 37000 份申請表，雖然最終有幾多居民遞交申請，仍然是有待統計，但是相信為數唔少。基於這個民生問題嘅考量，請問行政長官閣下，除了現有的各項惠民政策，特區政府是否會採取一些有效措施，進一步調控物價，紓緩通脹為民生所帶來嘅壓力？是否會考慮提前開放經屋其它單位嘅申請，而唔係等到今年年底，以便能夠更好地掌握居民對經屋各戶嘅實際需求，不致於資源錯配？本年度嘅施政報告提及，政府會研究“澳人澳地”政策，目前進展怎樣呢？

多謝。

**行政長官崔世安：**多謝陳明金議員。

主席，各位議員：

剛才嘅提問因為包括了好多個問題，我首先去答一個主要嘅問題。關於這一個社屋、經屋嘅重開問題，係社會廣大關注，喺我哋嘅施政報告裡面亦都明列了，首先我要向大家表明，喺過去一段時間，特別近期，劉司長同埋房屋局嘅局長已經係先後發表了，特別係對於這個社屋延後所產生去到要五

月，我覺得這個延誤房屋局亦解釋了個理由俾大家，但係作為一個政府，總係應該負責任地，我哋作為一個施政報告出現了延後，我表示整個政府向這個延後而產生嘅不方便，我係表示致歉嘅，而我哋五月亦都力爭能夠如期將社屋開隊。個原因大家亦都睇到，最近亦都解釋得好清楚，房屋局方面它有巨大嘅工作量，大家在這三年都睇得到，係應付過去的承諾，亦都為未來，加上經屋嘅法律亦都通過了，大家亦都依法下一步進行，喺今年內亦都會經屋開展。

但係總嘅嚟講，延後了但係都能夠俾返出一個時期，我認係一個負責任嘅政府應有嘅態度。我哋延後但係我哋有返一個時間表盡力去做返。所以我作為行政長官，我覺得應該喺這裏首先解釋清楚，亦都剛才表達了我哋對呢件事嘅發生致歉。

至於排了之後大家都睇到一廳一房開了咁踴躍擺表嘅情況，接住落嚟社屋、今年內嘅經屋，我認會睇到一個將來我哋點樣分析到向前，關於經屋社屋。但係借今日這個機會重新要向大家保證，居有所居，安居樂業這個政策其實係無變，這幾年嚟亦都盡了好大嘅努力去從這個方向去工作。當然，我認一個進步民主嘅社會，作為政府應該勇於接受批評，亦都係通過交流、交鋒之後我哋點去做得更好，但係個態度同工作方向係無變到嘅，我哋依然係以居有所居嚟到希望達到。但係現在嘅市場上係出現了一定嘅變化，我相信大家睇到澳門嘅過去一段時間樓價嘅問題。前一段時間劉司長大家簡稱出了十招，個價就穩，個量就跌；之後出了八招，個價就升，量就依然係跌。其實大家睇到這段時間嘅成交量，我哋係可以做返一個統計嘅表比大家睇到係跌了好多嘅，但係這個價錢嘅問題它唔跌，亦唔係單一嘅原因，我認為係多方嘅原因組成，包括了國家好多大家都關心到，有些國際量化寬鬆、熱錢，亦都大家睇到近期我哋作了一個政研室嘅研究，好多係澳門人買返嘅樓，這個我哋唔能夠唔去作一個比較，睇到同過去嘅改變，所以我好想主席同意，我哋會隨後送上一份關於我哋嘅資料，睇到個改變，唔係話我哋去推卸責任嘅問題，而係我哋要去面對目前過去嘅分別。同樣講通脹，過去係輸入性通脹為主，今日我們亦都係出現了一個大家都睇到，內部需求嘅問題。但係剛剛出嘅統計數據係比較好，這個通脹亦都回落了 5% 以下。但係當然我哋睇到全年嘅通脹依然係會有一定嘅壓力，但係我們亦都會，剛才陳議員問到，我哋過去嘅一系列措施保證繼續之外，我哋亦都會加強貨源、安全等等我哋已經做開嘅，特別係喺消費者法律法規嘅檢討裡面。最近我哋好高興睇到「兩南」，明確大家睇到這個豬肉嘅問題係跌嘅時候公開了，我們亦都令我哋澳門大家有個增加透明度去面對價跌嘅時候亦都應

該從批發到零售都係有所下跌。咁我覺得依然係會遵循這幾個方向去工作嘅。

多謝主席。

**主席：**請梁安琪議員。

**梁安琪：**多謝主席。

行政長官，各位官員，各位同事：

陳明金議員嘅問題同我第一條問題係大同小異，所以而家我係問第二個問題。

近期，內地已確診過百宗人類感染 H7N9 禽流感，並有部分感染者死亡，疫情亦持續擴散趨勢。目前，各省、市衛生防疫部門處於高度戒備狀態，全力防控疫情擴散。

本澳各出入境口岸每日都迎來一大批旅客，特別係“五一”假期亦將有大量旅客來澳，為防疫工作增加了難度。由於目前仍未有有效嘅疫苗預防病毒，防疫工作絕不能放鬆。日前，行政長官召集了跨範疇聯席會議，細化了各項防控預案，並表示要將對抗傳染病放喺政府工作嘅首位。

請問行政長官，可否詳細介紹一下防疫預案同埋下一步工作部署？本澳醫護人手已經好緊張，現再需加強防疫工作，喺人手上是否有充足嘅保障？救援機制是否能達到快速同埋高效？與周邊地區合作上，還有邊些擴展嘅空間？

多謝。

**行政長官崔世安：**多謝主席，多謝梁安琪議員嘅問題。

直到今日我哋收到嘅通報，總嘅病例係 110 病例，包括了台灣公佈嘅一個輸入性病例，而死亡係有 23 個病人。我哋經過十幾年嚟，其實面對過登革熱、禽流感、非典等等嘅傳染病，亦都累積了一定嘅經驗，喺過去亦都通過這些實踐嘅經驗裡面更加令到我哋對公共衛生突發事件有了一定嘅部署同預案。

喺今次這一個 H7N9 疫情爆發之後，特區政府係根據我哋現有嘅制度，已經由社會文化司張裕司長領導小組進行防控工

作。我哋係經過過去一段長嘅時間，我哋建立了一套監測同通報機制，包括了一般恒常性嘅通報同埋公共衛生事件突發嘅通報。這個係包括了內地、香港、澳門，包括了我們與世界衛生組織，我哋與世界衛生組織西太區嘅總部，亦都包括了有廣東省、香港、澳門。剛才講嘅台灣病例亦都係尋日同台灣通報過嚟嘅。我哋喺這個通報同監測方面我哋亦都係行之有效嘅。

目前嚟講我哋亦都檢視過各個部門，包括了我們所需要嘅檢測、藥品、個人防護品等等，一旦疫情發生喺澳門嘅時候，我哋係有一定嘅數量去足夠應付。當然現在我哋亦都係處於一個預防嘅階段，澳門亦都未出現到疑似同確診嘅病例，但係我哋亦都已經做好這個防線嘅工作，一旦係有病例發生，我哋將會提升我哋嘅級別，亦根據傳染病防治法，會批准成立協調中心，全面統籌整個疫情嘅預防控制方面嘅工作，大家可以放心。

剛才梁議員提到一個問題，我哋人手嘅問題。咁我諗大家都知道，喺公立醫療機構，其實時常都出現人手嘅問題，這個亦都影響到好多症嘅輪候。但係當有疫情發生嘅時候，基本上我哋有幾個程序，將會大概喺八個小時內會完全可以根據這個協調中心建立起嚟嘅。這個包括將所有衛生局屬下，同埋有關部門屬下嘅公務員停止休假；第二個我哋重新調配，將一些非緊急嘅服務是將它押後，而將我哋這個批准嘅傳染病防治中心裡面嘅協調方面重新部署，將所有人力擺喺優先次序特別對防控。我哋將公立醫院作為一道防線，亦都盡最大嘅努力唔希望擴散到社區，咁之後我哋亦都會有一系列嘅公佈，最重要其實亦係通過傳媒嘅朋友、廣大市民能夠根據我哋嘅指引，將疫情控制。所以喺幾個方面我哋亦都準備好，到時亦都有新聞中心，同埋我哋會建立熱線嘅雙向服務，讓廣大市民得到訊息，同時是一個高透明度去進行。

我哋亦都再重新檢視過我哋係有足夠檢測這一個病毒嘅能力、藥物同喺醫院內嘅保護，我哋會密切根據這個通報機制。目前現在世界衛生組織剛才講到未有疫苗，根據最新同我哋嘅通報，佢哋亦都未決定要製造這個疫苗。如果世衛決定製造疫苗嘅時候，我哋係一定會跟進嘅。另一個方面喺藥物方面，我哋已經同世界衛生組織確認這個藥品嘅廠係簽了定期供應，所以我哋是每一個階段喺藥物到期前已經做了更換同埋存足量嘅準備。

喺這個階段我諗我哋唔敢承諾無症喺澳門發生，但係我哋一定承諾會擺喺政府最優先嘅位置去保護好廣大居民嘅生命同

健康。咁這個係目前我哋嘅部署。

多謝主席。

**主席：**劉永誠議員。

**劉永誠：**多謝主席。

尊敬的行政長官閣下：

“善豐事件”發生至今已半年多，成為社會熱烈關注嘅議題。雖然當局事發後及時疏散住戶，亦都並且設法解決住戶暫時嘅住屋需要，以及展開一系列嘅跟進調查工作；然而，事件至今仍未有最終解決案，亦都引起了社會對本澳樓宇安全嘅隱憂，各界均高度關注善豐事件最終嘅詳細驗樓報告。

有見及此，請問行政長官閣下，現時有關善豐事件最終調研報告嘅進度係點呢？何時先可以對外公佈，以釋除善豐小業主，以至社會各界嘅疑慮？最重要嘅係，特區政府一貫以保障本澳居民的生命財產安全為施政大前提，而有見於本澳嘅舊式樓宇遍佈各區，為避免同類事件再次發生，當局日後將會點樣加強對在建樓宇嘅工程施工同建築材料品質上嘅監管？會否對已入住嘅樓宇作出定期巡查，以及對樓宇周邊建築工程項目作出更清晰嘅施工同防護指引及規範？

多謝。

**行政長官崔世安：**多謝主席，多謝劉永誠議員。

善豐花園事件發生後，特區政府係高度重視，我哋特別係要重視到安全嘅問題，特別係公共安全，亦都成立了跨部門嘅工作小組，妥善安置受影響嘅住戶，對受損嘅樓宇嘅結構採取了當時工務部門認為必須嘅加固措施，深入研究造成這個樓宇結構損壞嘅原因與及相關嘅責任，亦都將訊息向廣大居民發佈。

喺過去一段時間，大家都好關心這個樓宇發生了嘅事，都係圍繞住幾個方面：到底這個樓宇內有無僭建影響本身嘅結構；同埋周邊嘅建築物這些嘅建造等等有無影響到這個樓宇。亦都委託了專家學者作詳細嘅研究分析。可以同大家講，我相信好快就會公佈，因為我覺得首先要將這一個報告向廣大市民公佈，然後進行下一項嘅工作，因為好長一段時間大

家都希望能夠釐定個責任，因為如果產生了嘅損失到底個責任係誰屬。但係喺特區政府嘅角度嚟講，我覺得最重要係個公共安全，首先係要照顧了個安全，然後下一步。但係我相信我哋今次這個事件發生之後，俾了我哋好多嘅啟示，亦都俾了好多我哋去檢討嘅未來嘅工作方面。這個包括了現在工務部門加快將都市建築總章程嘅法規修改工作，亦都要完善關於建築質量嘅標準，檢驗違法處罰制度。另一方面亦都收了好多意見關於保險嘅制度，據我哋收到嘅訊息，現在嘅制度可能係強制性方面係值得我哋去加強嘅。亦都係俾到特區政府一個好好嘅檢討機會，就係遇到這些突發事件嘅時候，我哋特區政府喺現在係未有足夠嘅支援，這個包括譬如我哋要有足夠提供嘅住宿環境，點樣支援好，亦都係俾了個好好嘅機會我哋去改善嘅。

我覺得喺這次發生事件裡面，住客本身，包括了社會團體，亦都係發揮了我相信係好合作嘅精神同埋去支持這件事。最好嘅地方係無人受到身體嘅損害。下一步我相信好快就公佈了個報告之後，就需要跟進到底個責任係點樣去釐定，同時亦都會我諗係澳門係一個法治嘅地方，亦都係要依法從行政程序希望能夠解決，如果行政程序真係唔能夠解決嘅，亦都唔排除會進入司法程序。所以這個我覺得目前去到最好嘅地方就係無人受到傷害，亦都從公共安全嘅角度，我覺得政府係有需要一定加固好，唔好影響個樓有危險。至於下一步，相信個報告公佈之後去釐定個責任。我係完全贊成同支持盡快公佈這個專家所做嘅報告。

多謝主席。

**主席：**何少金議員。

**何少金：**多謝主席。

行政長官閣下，各級官員，各位同事：

大家好。

今年 2 月 20 日，當時時任全國人大常委會委員長吳邦國先生喺視察澳門大學橫琴校區時候就表示，作為粵澳合作開發橫琴的一個首要項目，其實澳大橫琴校區已經成為了澳門與內地嘅教育、科研、城規、社會服務和行政管理等方面這些緊密合作可以講係創新嘅範例。喺未來嘅這幾個月我哋會睇到，澳大橫琴校區將會投入運作，這個我哋可以預計，澳門與內地嘅教育這個合作空間必然會更加廣闊。當然，政府嘅資源或者政策

上面嘅這個支持係離唔開嘅，咁先至可以完善合作嘅空間。咁所以喺這裏我就想問下行政長官閣下，隨住澳大橫琴校園能夠夠起到一些示範作用，嚟到促使到澳門整體嘅其他高等院校都能夠有一個發展方向呢？

另外，好多時社會都係話澳門缺乏人才，咁而家澳大擴校，又點能夠促使培養更多有利澳門發展嘅人才呢？另外未來我哋又會唔會有一些更多嘅區域合作空間，嚟到促使我哋澳門嘅人才更具國際視野呢？

多謝。

**行政長官崔世安：**多謝主席，多謝何少金議員。

我諗首先俾一個數據大家參考，現在澳門中學畢業生升大率，根據 2011 年嘅統計數據其實已經達到 89.6%，這個係一個統計數據睇到升大率。咁我諗剛才提嘅問題包括了幾方面，一個就係澳門大學橫琴新校區建成之後完全搬遷後這個方向。我相信投入了，特別係得到中央嘅支持，有這一幅咁寶貴嘅土地，而經過三年嘅時間建成了這個澳門大學橫琴新校區。根據大學俾我嘅資料，是希望發展成為一萬人嘅大學。咁我相信它未來嘅拓展發展嘅空間係有好大同埋好闊。

但係剛才提嘅問題，我諗其實值得大家去思考一下，亦都集思廣益一下。我哋澳門大學嘅建基，它嘅使命係為了咩呢？這個亦都關係到它發展的未來。我個人認為澳門大學發展它嘅使命，應該建基首先係為澳門特別行政區去培訓人才，作為澳門人嘅一所大學；第二我哋亦都係圍繞住我哋經濟多元發展所需要培訓嘅人才透過這個能夠有空間、有資源嘅發展機會去配合整體嘅發展需要。這個高等教育輔助辦公室喺前一段時間亦都係進行了做人才嘅資料庫，我係俾意見佢哋繼續擴大到整個地區嘅人才資料庫同埋未來培養所需要人才，喺這方面作出研究。

第二個方面我諗大家都談了好耐，亦都我自己收過好多意見，我唔係有一個研判話我聽嘅意見之後我可以覺得邊樣啱與唔啱，但係我覺得值得大家去討論同埋研究嘅，就係我哋嘅澳門大學到底應該收非澳門學生嘅比例。這個係一個我哋應該可以去探討研究嘅。我睇到喺我嘅材料裡面，大學方面希望除了科研、人才培訓、招生方面，亦都要擴大合作，這個包括了國際生，包括了內地生。但係喺過去這兩、三年，我聽了好多意見，其實有一個我覺得相互關連，亦可能相互矛盾嘅。過去我

哋好多中學畢業生都唔係澳門，去了其他地區升學，內地或者去了唔同嘅國家地區，但係近期亦都有所改變嘅。而留喺澳門嘅學生多了，咁學生有時又覺得喺澳門都好難入到學，某些科某些學校。另一方面，內地亦都好多學生希望嚟澳門升學。咁喺這個研判裡面到底我哋應該去點做呢？我個人係認為澳門大學嘅使命始終建基係培訓澳門嘅學生為主，至於這個比例應該係點遞增，或者點樣去釐定呢，我覺得其實係值得研究，因為何少金議員剛才提了個好好問題，就係其他嘅高等院校透過了今次，因為澳大大家都知道都嚟向主席、各位議員報過整個預算嘅投入係一個澳門教育歷史裡面最高投入嘅一個學府。既然投入了喺澳門大學，咁其他嘅高等院校佢哋依然係依照佢哋嘅辦學使命繼續為澳門培養人才。咁係咪喺下一個階段我哋要適宜更好支持澳門其他嘅院校同埋研究機構，去配合來到培訓更多嘅多元人才，為未來澳門嘅發展相配合。因為多元發展始終近期大家都係一個討論熱點就係人才嘅培訓，人才嘅培訓我相信高等院校係一個非常重要嘅一環。

所以今日這個問題我覺得係值得我哋明年施政裡面點樣支持好這一個澳門其他嘅高等院校。我相信經過今次嘅投入同埋過去澳門大學嘅努力，澳門大學已經係一個比較具規模嘅綜合大學，對佢哋發展同成長我相信具有好大嘅信心。但係我哋還有其他澳門嘅高等院校，它包括了有綜合大學，有一些專項學院，亦有一些係國際研究機構等。咁我哋係咪應該從個政策資源上更好去支持其他嘅高等院校，包括軟件硬件，令到它更有發展空間嚟到符合我哋培養人才這一個長遠嘅目標。

至於這個收生比例我覺得亦係值得大家探討一下。因為目前我哋睇得到想嚟澳門讀書嘅學生係多了，所以我覺得唔係擔心個生源，係要點樣能夠真係培訓到人才。當然亦有一個概念認為其實喺澳門讀書嘅非本地居民都係澳門嘅人才，將來他完成了學業係咪澳門亦都可以去利用這一批人才嚟到將澳門嘅經濟多元發展呢，更加能夠充足人才資源，但係我睇過幾個研究，特別我哋一部份嘅年青朋友，他提出了唔同嘅意見，咁這個我諗又係值得大學去探討下，因為這個政策如果一定，可能係好多年澳門人才培訓嘅一個轉變，但係目前嚟講政府未有定案，但係我諗時間亦比較緊迫，喺明年嘅施政一定係重視了人才培訓。人才培訓可能唔可能單獨去傾，其實好多相連嘅環節，我哋提供機會、提供資源，同埋點樣去分配，這個亦都係重要嘅。但係我個人認為，支持澳門大學嘅發展投入了咁大嘅資源，中央批了咁好嘅土地，其實同步亦應該去支持其他嘅高等院校，讓高等院校嘅多元發展培訓更多人才，配合到我哋多元嘅發展。這個雖然個路好難行，但係多元經濟需要人才嘅配

合，可能亦都我哋真係需要嘅。

多謝。

**行政長官崔世安：**多謝關翠杏議員。

剛才何少金議員提到我哋嘅區域合作，其實我哋除了同省港澳嘅區域合作，其實現在嘅高校已經同好多地區有合作，包括了歐洲、美國、葡萄牙、日本、星加坡、瑞士、英國等，這些亦係一個國際教育嘅網絡，因為大家都知道高等教育國際化，所以我哋亦都應該鼓勵更多這些合作計劃，使到我哋有機會提升我哋嘅高等教育。

總觀嚟講，其實澳門嘅高等教育個發展期唔係好長，亦係我諗係一個再俾到好機會我哋繼續發展嘅。

多謝主席。

**主席：**關翠杏議員。

**關翠杏：**多謝主席。

長官閣下：

發展經濟嘅目的係要改善民生，令居民安居樂業。而家澳門經濟發展了，但係居民反而覺得安居無望、生活壓力比以前仲大，打工仔更加成日驚住外勞同埋黑工威脅。

喺就業方面，政府話就話維護勞工權益，但喺涉及勞動就業立法上面，只係任由勞資雙方“拗手瓜”，既無積極協調亦無主動作為。就算應承了嘅打擊黑工立法、設立破產欠薪墊支基金、規範建築業承建商同分判商責任，以至到完善工傷保障、重訂特別駕駛執照制度，同埋修訂單方解約賠償上限，都未掂！

喺安居方面，萬九公屋而家只係處理緊當年嘅輪候需求，對於呢八年累積落嚟嘅申請點樣回應呢？劉司長話“巧婦難為無米炊”，但係我覺得唔係囉。只要政府肯做，可以收返閒置土地，亦都可以即刻喺新填海土地規劃公共房屋，甚至推動落實“澳人澳地”政策，其實只要肯想肯做，我相信辦法一定比困難多！

特首我希望你知道，而家申請公共房屋係居民唯一可以解決安居嘅方法之一。所以我想請問你有冇辦法回應居民“安居樂業”嘅訴求？

我諗剛才關議員所提及了在兩個範疇。喺前一段時間我哋亦都聽取了好多關於勞工界別、商界嘅意見，特別係勞工界別提出了係希望政府更積極地從立法，更積極地需要有一個立場嘅表態嚟到讓勞資雙方拉近嘅，所以本澳勞資權益重大問題我哋仲係覺得需要由政府、僱主、僱員代表進行充分嘅討論同溝通，喺這個機制實施亦都符合特別去解決一些複雜嘅問題。

喺前一段時間，喺幾個方面我哋亦都係提出了政府嘅立場，現在亦都喺這個社會協調常設委員會度討論，我睇到過去十日，譚司長亦都發表多過一次一個跟進立法，一個起碼政府表了個立場，可以拉近了大家去傾。咁這個我諗我哋會去盡力去跟進。

關於安居嘅問題，其實我相信特區政府係無改變過希望安居。我哋希望安居其實係主要為澳門居民嘅居住需求嚟到解決問題。剛才關議員亦都提到劉司長有苦處，他無地。咁我諗劉司長其實這三年亦都好努力，大家都睇得到去建設房屋。

談到公屋嘅問題，到新嘅澳人澳地問題，我諗借今日這個機會同大家分析一下我收到嘅意見。我覺得公屋方面除了這萬九之外，亦都係已經公佈嘅六千三，政府係用盡盡量嘅辦法點樣將些公共設施或者可使用嘅地，再配合今年開了隊之後嘅輪候情況。剛才提到嘅我相信包括了閒置土地，或者一些政府可以能夠收回嘅土地，咁喺這裏可以同大家講，基本上喺過去積壓了一些大家稱為閒置嘅土地，特區政府已經喺二十八幅土地裡面宣告無效，進行緊行政程序。這個我哋將會繼續跟進閒置土地。

至於談及到澳人澳地嘅問題，我諗大家其實個關心就係係未來五幅嘅填海造地。咁喺初步我哋嘅掌握，整個五幅土地大概可以建四萬三千個居住單位，我諗這個約數又唔好箍死我個數，因為我未必準確晒，到時多多少少，敬希見諒，唔好鎖得咁死亡，這個係約數。喺這個約數嘅基礎上，中央批俾我哋嘅五幅土地係明確要提升澳門居民嘅生活素質，所以前一段時間特區政府亦多次宣佈唔會有博彩業喺這五幅土地，基本上亦都多次表達了公共設施、公共房屋係優先考慮。

喺舊年施政嘅時候，多位議員喺前後都提出了個新概念澳

人澳地。咁這個概念我諗係近期因為個地產市場大家關心到澳門人嘅居住。其實大家都知道整個政策上，我哋真係希望澳門人能夠居有所，經濟能力唔符合嘅，我哋可以喺社會房屋方面亦都能夠俾到一個支持。經濟房屋大家亦通過了法律，根據法律經濟房屋購買。咁澳人澳地係好希望能夠喺新填海造地，或者我哋將來能夠收回嘅土地裡面點樣一個創新思維。喺澳人澳地，現在係處於一個研究嘅過程中，含義方面我哋嘅理解就係產權由澳門人所有，房屋由澳門人居住。澳人澳地嘅實施係政府以政策性引導，喺有限嘅土地資源之中劃出俾澳門人使用。這部份嘅資源係脫離了私人房地產市場嘅自由流動，因為他有限制，同一般唔同。由於澳人澳地房屋嘅建築出售都係由政府主導，所以喺定義上我哋都要研究同公共房屋嘅資助性質他嘅相同與不同，亦都可能係一個補充，因為政策限制嘅條件唔同。我們已經，劉司長已經通過搵了兩個學術機構進行這個基礎研究，裡面亦都包括了聽取民意、諮詢工作等等。

但係喺這段時間裡面，同大家亦分享一下，我收到好多意見。我唔係反對澳人澳地，首先因為係一個新嘅探索，我覺得大家可以聽取一下。有利嘅方面我聽到有幾點：一個就係一定程度上幫助到一批夾心階層上樓，符合了社會公平分配嘅原則；但是第二亦都回應了居民擔心外來投資者增多嘅時候喺土地資源缺乏嘅情況下，未來係失去了居住保障，政策喺一定程度上係減低了居民對居屋預期需求嘅憂慮，緩和了一定樓價嘅上升；第三喺土地資源的使用作出新規範，引導土地資源嘅使用符合一個社會公平嘅原則。

喺我收到不利嘅方面，亦都係喺兩個方面擔心嘅：一個係削弱了競爭力，這個係一個擔心；第二個擔心就係關係到澳人澳地如果喺這個夾心階層嘅情況下，對基層係咪亦出現了唔公平同埋受損？

我講有利同無利那個唔係我嘅意見，係我收集到嘅意見，因為個研究未展開，而家已經開展了，咁所以我同大家分享一下，因為一個新概念我覺得係真係好值得要去研究同埋調查。公共設施同公屋我諗大家唔使擔心，我哋係一定根據承諾去做，但係一個完全咁嘅新概念出呢，我諗其實個研究係值得嘅。同時，借今日嘅機會，因為近期我收到好多意見，擔心五幅土地已經若干批出，到今天係無批過未填嘅這五幅填海造地，第一幅係施工緊嘅。所以這個喺未來規劃上我覺得這個澳人澳地係應該值得大家去探討研究，但係有一些有利不利嘅都要同各位議員介紹，因為一種係我哋現存制度唔存在嘅新嘅制度去惠及澳門居民係對目前嘅地產市場。但係地產市場其實係

一個波動嘅市場，近期大家看到，好多我自己認為係泡沫或者唔合理嘅，包括了一個家庭嘅收入供屋嘅比例過高，因為你樓價嘅升，同埋好擔心一個心理預期。近期大家睇了我特別參考了一個研究，好多年青人都申請了這個公共房屋嘅經濟房屋嘅一房一廳。咁這個亦都係俾我哋體現到他一個心理預期希望。同埋從我哋初步睇嘅資料，可能好多這些青年朋友仲係在學嘅，這個我又無結論性，係一個好大可能，俾到我哋睇到好多我哋未來房屋市場發展。其實房屋市場我相信好重要供求關係，亦都好重要到整個市場，所以我都係重新喺這裏呼籲廣大澳門居民，買樓嘅時候一定要好小心研究過自己嘅經濟能力承擔，因為現在供一層樓係好長嘅時期，另外一個亦都要睇到市場嘅波動，同時我哋亦都係要關心到這個長遠承擔所產生嘅後果，因為處於一個低息嘅時期，我哋亦都唔能夠否定將來會有加息嘅可能。種種原因，我諗作為一個提示亦係希望市民去關心。

多謝主席。

**主席：**高開賢議員。

**高開賢：**多謝主席。

行政長官閣下：

博彩業高速發展為澳門帶來了機遇，但係同時亦吸納了唔少人才，制約了其他產業嘅發展，即使特區政府不斷推出唔同措施扶持其他產業發展，但係仍然難以扭轉博彩業一業獨大嘅局面。

喺「兩會」期間，現任全國人大張德江委員長喺當時同澳區全國人大代表談了三點意見，其中提到澳門人才，特別係各類專業人才缺乏，制約澳門長遠嘅經濟結構調整。澳門要放寬眼界，面向全國全世界培養人才，現在就要開始努力十年、二十年後可見成果。

而事實上，人力資源與產業結構密不可分，推動本澳經濟適度多元發展，係特區政府經濟發展嘅目標，但係本地人才缺乏，阻礙產業多元發展。

想請問行政長官閣下，有咩計劃能夠更好咁為澳門嘅可持續發展，培養和儲備各類專業人才，以實現經濟適度多元嘅目標？

多謝。

**行政長官崔世安：**多謝主席，多謝高開賢議員。

我諗大家都唔會否定人才係社會進步嘅基石，我哋需要經濟適度多元，就需要適度多元嘅配合人才培訓，提供這個工作機會，令到培訓出嚟嘅人才亦有機會發展所長。喺澳門現在嘅發展過程中，我諗大家剛才聽了高議員講，特別我哋亦都學習了張德江委員長發表這個重要講話裡面嘅經濟多元需要人才，單一嘅博彩業喺長遠同持續發展裡面事實係存在了這個風險嘅。這個我諗係好認同。

咁喺多元嘅發展裡面，我哋睇下兩方面，一個係圍繞住博彩業嘅非博彩元素，喺這幾年亦都有一定嘅增長，包括了零售業、服務業、餐飲、酒店、娛樂、製作等等，同埋這個運動事業等等亦有一定嘅發展。至於其他嘅多元經濟，中央亦好支持，包括珠海嘅橫琴，包括了廣州嘅南沙，喺透過這個區域發展經濟多元去支持澳門特區去進入。咁所以我相信喺咁嘅情況下我哋特別會喺明年嘅施政重視培養多元人才，透過我哋現存嘅高等院校，包括澳大嘅發展，係希望能夠培養更多嘅澳門人才學成之後留澳亦都是為多元經濟發展。這個可能唔係一個短期可以做到，但係總係需要有個規劃同埋起步，這個亦都係交流過，咁我覺得我哋需要有一個系統性支持去做這個工作。

第二個方面我相信博彩業喺澳門經濟嘅比重大家亦都好清楚，喺整個發展嘅過程中，特別喺博彩業開放之後所佔嘅經濟比重，一下子要扭轉過嚟我相信亦唔容易，亦會佔據一個比較長嘅時間，但係這個唔阻礙我哋非博彩行業配合去發展嘅，所以這個我哋亦都會大力鼓勵特別係新嘅綜合項目，喺這個非博彩業嘅元素裡面增大，使到它整個綜合項目嘅收入，博彩同非博彩能夠拉近。另外亦都政府從政策資源投入去支持多元嘅經濟，咁係這方面我哋特別要趕喺下一年我哋希望目前準備做緊嘅，要加大支持澳門嘅中小企，使到佢能夠不但喺撥地經濟，亦都喺區域經濟裡面有一個機會去發展，這個而家正正係研究草擬之中嘅。

多謝主席。

**主席：**林香生議員。

**林香生：**多謝主席。

長官閣下：

因為房屋問題你答了好多，我就轉去第二個問題。

近幾年嚟，博彩稅收收入增長，使澳門特區積下了一定嘅財政儲備，但係特區政府嘅公共開支喺 2007 年以來每年嘅增幅驚人，甚至超越整體經濟嘅增長幅度。2008 至 2012 年呢五年嘅增長幅度係 37.6%、30.4%、11.6%、29.7%、15.8%。另外喺各年嘅公共開支金額係：2007 年係 147 億；去到 2012 年我哋係 567 億。

行政長官閣下，2012 年的公共開支係 2007 年嘅 3.8 倍。你對公共開支這種增幅有咩見解？會否引入類似“績效管理”嘅方式方法，喺公共部門推行“經濟、效率和效益”嘅做法？未來喺公共開支方面會否推行規範增長幅度機制，以及制訂相關抑制公共開支增長嘅法律法規？

多謝。

**行政長官崔世安：**多謝主席，多謝林香生議員嘅提問。

我諗我哋管理這個財同公共開支，基本都係以基本法嘅量入為出，同埋發展經濟改善民生為我們主要嘅依據。喺 2012 年，我哋通過了核算之後，其實 2013 年同未來兩年，我同譚伯源司長亦都係經過多次嘅討論，我哋係希望將個總量能夠保持喺一定嘅範圍裡面，這個是整個政府支出，咁而家我哋係進行緊這個工作。當然有突發事件或者真係要增長嘅，譬如頭先談到嘅，我哋亦都會適當去增長，但係有一個概念就係總嘅支出希望喺個總量那裏能夠規範佢嘅增長唔大，這個係一個我哋 2012 之後，2013 年同埋未來兩年希望能夠作一個比較有規範。

但係我想補充返兩個數據。喺我哋嘅民生範疇裡面，佔了我哋支出從 2010 年 49.8%，2011 年去到 66%；2012 年係 72.6%；2013 年我哋亦都係 73.9%。其實大家睇返 2012、2013，基本上我哋已經係通過控制，但係投喺民生嘅比例實在係比過去增高了好多，這個亦係我哋需要去做嘅工作，發展了經濟，改善民生，希望能夠投入到去為民生嘅工作；第二個方面就係大家成日談及到嘅本地生產總值同政府開支嘅比例，咁這個我哋喺 2009 年係 19.7%；2010 年係 16.9%；2011 年係 15.5%。我哋仍然保持係 20% 以下，這個其實係一個好多國家地區都所採取嘅概念，就係本地嘅生產總值同政府開支所佔嘅比例，我哋希望能夠喺 20% 以下嘅。

咁這幾個主要係同大家解釋一下同埋未來我哋管理公共開支嘅一個概念。當然亦都未係一個實數，我哋從一個概念來到去執行。

剛才提到績效管理，其實喺施政報告已經同大家介紹了今年會執行績效嘅管理，而喺財務上嘅，特別係預算績效管理，我諗我哋亦都會相對去跟進嘅。這個係可以放心，係包括了喺裡面嘅，特別我哋亦都參考了譬如內地對於財務，特別係公共財政管理要求嘅科學化、規範化、精細化裡面，現在好提倡預算績效管理嘅。咁我哋亦都會喺整個績效管理裡面係關心到支出嘅，因為我知道好多社會人士，包括亦都好多議員、朋友同我提到，好多公共支出其實喺我哋提交預算案嘅時候大家係好同意嘅，係通過嘅，但係某些單一嘅項目，因為投資好，因為改變好，增加了好大，這個係大家好關心嘅。咁我覺得通過一個機制係咪我哋可以增加大嘅支出嘅項目，同立法會進行介紹說明解釋，嚟到進一步大家可以睇到個實際情況點解他咁做，俾一個雙向溝通嘅機會大家，我覺得係一個……我自己認為這個係大家其中一個關注點嘅。但係，績效管理裡面包括了預算嘅績效管理，這個我哋係會做嘅。但係我要強調一點，喺政府嘅支出裡面，基本他係存在了經濟效益同埋社會效益。經濟效益你係容易去量度，但係社會效益可能唔係每一年你都可以去量度得到嘅，包括從宏觀如國家安全、社會穩定，到社會嘅調節、社會保障各項事業嘅穩步發展等等，可能有些社會效益它唔能夠好似經濟效益咁易量度出嚟，但係我覺得績效嘅這個管理同評估係需要做，我哋亦都會做，係關係到政府財政收支，特別係支出方面嘅。

多謝主席。

**主席：**徐偉坤議員。

**徐偉坤：**多謝主席。

行政長官閣下：

我條問題同高開賢條問題係一樣嘅，就係現任人大委員長張德江關注到澳門正面臨著三方面嘅挑戰：第一係博彩業獨大；第二係適度多元發展更要加大力度；第三係人才，特別係各類專才缺乏。這三項挑戰其實係同出一轍，互相影響。正由於澳門缺乏各類專業人才，令致我們經濟適度多元受到制約，因此而一直難以脫離博彩業獨大這個狀況。於是，現有的人才繼續以龐大嘅比例流入博彩業。惡性循環之下，其他產業

更難發展，產業結構嘅調控則越來越難實現。由此可以睇到，人才不足與單一化，正是上述三個問題挑戰嘅核心難題。

今日嘅澳門依然繁榮，但係正如張委員長提醒，我哋必須居安思危。要產業多元，先決條件係要具備人才。請問行政長官閣下，政府會否制訂一套全盤嘅人才計劃，培養本地人才和吸納外界人才，增加各類專業人才嘅供應量，藉此促進博彩業以外的產業健康發展，以達至產業適度多元嘅最終目標？

多謝。

**行政長官崔世安：**多謝主席，多謝徐偉坤議員。

我諗剛才喺答高開賢議員嘅問題嘅時候亦都答了一部份，咁我諗徐偉坤議員喺個問題嘅後部份特別關心到我哋有無整套嘅計劃去培養人才。我諗培養人才其實從個長遠發展我哋有兩方面，一個係配合整個地區嘅發展，特別談到經濟嘅發展；另一個方面亦都係要為提升居民嘅人文、科學，特別係提升居民嘅素質，特別係接受高等教育，喺這裏去增強素質嘅。我諗這個我哋一定要尋求平衡，唔係單係我哋設計嘅學科就純粹為經濟嚟去配套，當然這個係一個主要嘅方向。咁未來我諗我哋同高等教育機構研究嘅時候都係兩個嘅戰略目標同時去行，就唔會係單一去行。但係隨住經濟發展，我哋需要嘅人才，我諗就正如我哋頭先所講，主要係兩個方面：一個方面博彩、非博彩這個佔嘅經濟比重好大；另外一個就係支持傾斜新嘅多元經濟發展所需要嘅人才。咁通過我哋澳門嘅高等教育輔助辦公室，已經開展了人才資料庫，我諗進一步可以喺這方面加大力度去做這個初步嘅工作。這個工作其實不易嘅，因為市場係流動，同埋經濟嘅發展亦都隨住個市場，所以我哋盡量去做，但係希望能夠有一個初步嘅規劃，係特別點樣支持澳門人。

其實另一個想談嘅，就係澳門人亦都唔需要一定係喺澳門受教育嘅，現在我哋睇到亦有好多我哋嘅大學、大專學生係離開了澳門去受教育。所以我哋睇到亦有好多我哋嘅大學、大專學生係離開了澳門去受教育。所以喺高等教育範疇亦都俾了意見我，都希望支持好嘅外地讀高等教育嘅同學，但個關鍵係希望佢哋返嚟為澳門服務。頭先幾位議員都談過啦，以前讀了書擺到學位又返嚟澳門，好似無用武之地，搵唔到一個理想發展嘅機會。咁現在可能經過這十多年嘅經濟發展，比過去好一些，返嚟嘅就業機會亦都高一些。但係我覺得其實好重要嘅一樣，就係點樣我哋去尋求建立到俾我哋澳門人有第二機會，這個簡單講，如果他未完成基礎教育，完成基礎教育；他未完成高等教

育，俾機會他去進修。他其實個關鍵在於你進修之後先至有機會向上流動，所以這一部分我覺得其實我哋應該更加透過同僱主嘅合作，僱員自己自願參加，向上流動嘅這塊可能係未來我哋要投入好多資源，因為其實大家都好明，做工還要讀書其實係好辛苦嘅事，亦都係關係到本人有這個決心同有提升素質嘅決心先得，而且個時間唔短嘅。我個人嘅經驗，我以前從事這些教育工作嘅時候，特別係夜校，特別係進修好，開班好高興嘅，中段少一半，到尾有時又少些，所以我哋係應該點樣支援好，係能夠在職培訓，特別係向上流動這塊，唔係話佢哋唔想學，種種嘅原因，他工作壓力好，他家庭壓力，他本身嘅健康好，都影響一個人進修。所以我諗，係兩目標並行可能會好些：一個就係未有過去受到教育嘅機會，我哋提供俾他；一個就係澳門年青人我哋俾機會支持好他，令到澳門整個人才的培訓提升，我哋嘅資料庫希望能夠澳門嘅人提供他又願意嘅返澳門服務。咁這個我相信係我哋這個發展期裡面，喺這個經濟高速發展可能造就到嘅機會，過去相信亦都無咁好嘅機會。

多謝。

**主席：**高天賜議員。

**高天賜：**多謝主席。

長官閣下，各位官員，各位同事：

喺澳門，好多嚴重嘅問題，例如土地、墓地、房屋、醫療都係涉及因為至今未有高官問責制。揭發前任工務運輸司巨大貪污醜聞需要六年，原因他係主要官員。

雖然這個醜聞出現了之後仍然有個別嘅主要官員唔肯承擔政治和紀律責任。因社會嘅壓力，長官閣下喺 2010 年頒佈了主要官員的通則。

需要強調，十個墓地係回歸後第二大醜聞。前任運輸工務司需要六年就係因為他係一個主要官員。十個墓地亦都拖泥帶水，喺司法行政石沉大海。有一句說話係咁講嘅：上樑不正下樑歪。

另外，澳門市民希望立法會選舉管理委員會成員有一些比較嚴格嘅高道德嘅職業操守。但係我本人非常之失望，因為竟然喺裡面嘅成員揀了一些嫌犯，同埋一些局長濫用職權，因為他屋企好多嘢做，所以擺高纖同互

聯網喺屋企用公帑，阿公俾錢。

所以請問行政長官：對於問責，容忍嘅尺度同寬鬆嘅尺度喺政治和紀律責任係點樣體現，係咪越高嘅越鬆懈呢？

多謝行政長官。

**行政長官崔世安：**多謝主席，多謝高天賜議員嘅問題。

我諗首先要表明，作為一個行政長官，我俾大家同社會更關注同重視涉及官員嘅事件同埋司法案件，這個因為我嘅責任，而澳門係一個法治嘅社會，需按照法律嘅規定，這個係前題。

我諗談到這個墓地事件，大家亦都好幾年啦，過了。喺墓地事件發生之後，我作為行政長官亦都透過我哋嘅新聞部門公佈了當時廉政專員進行獨立嘅調查。專員進行了一系列嘅工作之後，亦都將這個調查嘅報告公開了，大家亦都睇過。喺這裏過去多次對我提出批評，認為我將這個報告交俾陳司長去處理係自己人查自己人，我借今日這個機會亦都要講一講。當時我哋嘅新聞公佈係交俾廉政專員去行使他獨立嘅調查對這個墓地事件，報告亦都公開了，所以我係從來無，亦都無交去俾陳司長同她相關嘅官員去調查這件事。第二，我交俾陳司長嘅工作係這個調查報告之後所提出嘅意見，去作為管理民政總署嘅司長去跟進改善，這個亦都一系列嘅程序做了。咁我諗今日亦都，因為多次向我提問，我亦都可以講得好坦誠一些。作為一個行政長官，他履行根據《基本法》賦予嘅權利，我諗亦都喺誓詞、誓章裡面明確，其中一個就係一定要遵守法律，而澳門特別行政區發展嘅核心價值，我相信司法獨立、遵守法律，這個係必須嘅。同時大家亦知道，根據《基本法》非常明確，我哋嘅法院運作只係服從法律，係唔受干預嘅獨立運作。所以好多次問我提到，亦都係大家已經知道，因為檢察院方面亦都明確了我哋民政總署有四位同事係喺這個預審階段。但係大家可以好清晰知道，預審階段嘅時候，我哋係有一個讓它預審嘅獨立進行同埋保密嘅原則。作為一個行政長官，我相信必須去依從這個原則，但我可以鄭重承諾各位，預審有結果之後，只要預審嘅法官通知行政當局，我哋必會跟行政程序去做我哋應該做嘅工作。這個我借今日嘅機會要表明，因為喺預審嘅過程之中，大家知道預審係有兩個結果，一個唔起訴，一個起訴，起訴將會排期處理。如果預審有了結果之後，預審法官通知行政當局嘅，我哋會必定依程序去進行，亦都向大家保證承諾。這個唔係我作為第三屆行政長官咁做，而係我哋第一、第二屆嘅

同事亦都係根據行政程序去處理嘅，所以亦都可以放心。

至於講到高官問責，我哋亦都有一系列嘅規距去依循。當然，過去發生嘅不幸嘅事，我哋亦都睇到係繩之於法，亦都係裁決了。咁我諗今日嚟講，係咪大家都容許一些時間，因為無論行政程序好、司法程序好，它都要時間進行，我哋亦都尊重司法嘅獨立性、司法嘅保密原則，讓個司法程序進行完，通知行政當局，行政當局自然就會依法去進行。喺未通知之前，亦都要堅守這個我哋保密嘅原則同司法獨立嘅原則，因為如果我作為喺今天這個位置唔遵守這個原則，我諗係違反了我哋作為遵守法律最基本嘅原則。所以我好坦誠可以同高議員交待，亦都好清晰解釋我哋而家作為政府嘅立場。過去係咁，現在係咁，我相信將來亦都需要係咁去依法去做。但係你放心，預審程序一完，如果預審嘅法官通知行政當局，我哋一定會依法依程序去做。

多謝主席。

**主席：**蕭志偉議員。

**蕭志偉：**多謝主席。

行政長官閣下，各位官員，各位同事：

澳門作為中國與葡語系國家經貿合作服務平台，具有許多獨特優勢，經過發揮這些優勢，以及本澳多年來嘅平台作用，中國與葡語系國家嘅經貿合作同交流漸顯成效。

喺推動經貿活動、往來同埋合作嘅過程之中，人才喺當中扮演著一個舉足輕重嘅角色。因此，人才嘅培養極其重要，而本澳十分缺乏熟悉葡語系國家商業操作及法律方面嘅經貿人才，縱使特區政府開設了葡語課程，而本澳嘅大專院校亦都承擔著培養人才嘅重任，開設葡語翻譯、葡語系國家法律等課程，為配合葡語人才嘅需求創設了條件，然而，葡語經貿人才嘅數量仍然不足。

請問行政長官，喺目前嘅基礎上，特區政府點樣透過強化葡語人才培養機制，將澳門打造成為一個集法律、金融及經貿一體化的葡語人才培養基地，以應對將來葡語商貿平台嘅需求？

多謝。

**行政長官崔世安：**多謝主席，多謝蕭志偉議員嘅提問。

大家都知道，現在澳門特區嘅發展一個中心就係世界旅遊休閒中心，一個平台就係對葡語系國家商貿嘅平台。我哋非常之重視對葡語系國家平台這個機會嘅發展，所以剛才提到亦係近來好多社會人才關心到我哋澳門係一個好有利去訓練葡語專業人才嘅地方，咁這個特區政府係好認同嘅，因為過去嘅一段時間，從前政府到特區政府，我哋係有一定嘅基礎，這個包括喺高等教育，亦包括喺非高等教育裡面，已經打下了基礎。所以喺這方面嘅發展我哋係具備有利嘅條件，亦是有符合這個平台發展，所以我好同意你嘅講法，亦都會進行這方面嘅工作。喺現在嚟講，簡單我哋係有政府支持推動高等學校持續加強葡語教育，與葡語系國家嘅跨校合作，特別係提升了大學對法律經貿領域雙語人才嘅培訓。現在僅喺澳門大學一學年就有超過一千人報名讀葡文班，亦都我哋喺基礎教育裡面嘅葡語系教育體系，喺去年嘅統計，公、私立中小學修讀葡語課程嘅學生總共接近有四千人，咁喺這個基礎上去加強葡語嘅培訓，我相信我哋具備條件嘅，一方面當然係需要好嘅課程設置同埋好嘅老師啦，咁這方面我哋會積極配合，特別係發揮對葡語系國家平台嘅作用。

多謝。

**主席：**麥瑞權議員。

**麥瑞權：**多謝主席。

尊敬嘅行政長官閣下：

最近澳門貧富懸殊嘅堅尼系數又大了，但係好多市民話俾我聽，現實嘅數字真實嘅情況就更慘。好似長者睇病難嘅難題，就越來越有問題。好似一些基層家庭裡面，如果長者要睇醫生，一些後生嘅就請假扣人工陪他睇醫生，雖然政府口口聲聲話尊重長者，又話市民輪候睇病時間與周邊地區差不多，但根據本人及有關社團一萬幾個家訪個案中顯示，好多長者話輪候時間起碼要三、四個鐘頭，甚至五、六個鐘頭，預約專科有些甚至半年至一年不等，等候影像科拍照檢驗嘅時間甚至係半年至一、二年不等，期間，病者須承受病魔的折磨，家人更加憂心病情，帶來這個壓力，影響生活素質，亦都極有可能未及確診已經病情加重。為了解決睇病難這個難題，市民叫我請教下行政長官：行政當局曾經承諾開設長者專科，縮短長者輪候時間嘅專道，上半年可唔可以實施呢？同埋今年內可唔可以實

現將影像科，甚至專科服務外判俾一些通過考核嘅私家醫療系統；最後，今年內可唔可以設置電子病歷咁方便市民外診等去解決睇病難嘅民生困境呢？

多謝。

**行政長官崔世安：**多謝主席，多謝麥瑞權議員。

關於麥議員所提嘅幾個問題，我首先要講一講這個堅尼系數嘅問題。堅尼系數其實係量度社會上收入分佈不平衡嘅程度，這個定義，但係我唔知有無搞錯，如果我搞錯麥議員你提示下我，就係最近我相信係有一個研究嘅機構出了一個報告，關於堅尼系數。咁這個報告裡面係睇得到剛才麥議員同我提出嘅問題、擔心同反映驚這個貧富懸殊嘅差距增大。

我喺度首先表個意見，我睇過這個報告，我個人同這個報告之間我想提一些問題，就係個收入同埋他做出嚟嘅系數嘅表達，我唔係話它唔啱，我覺得有商榷嘅地方，特別係收入嘅部份，而影響到他做出這個堅尼系數嘅結論性，我哋叫點子啦，成日我哋講 4，這個問題大家可以喺會後值得探討一下。但係我完全同意你同埋所提嘅問題，點樣做好老人家嘅工作。做這個老人家嘅工作我覺得係我哋政府同埋全社會都應該做嘅，我哋澳門嘅長輩長期為澳門嘅發展努力貢獻，到今日我哋經濟有一定嘅基礎，我哋回饋同照顧好我哋嘅老人家係應該嘅。

咁根據我嘅資料，其實喺今年初，衛生局內已經設了老人科，亦都設立老人專科嘅門診，但係剛才麥議員所提到排嘅時間同埋轉去專科，譬如影像科這些時間，我諗其實公營嘅醫療機構喺世界唔同嘅國家地區，他依然存在輪候嘅問題，包括特別係你講影像科，我都睇過好多統計，事實真係好長嘅。鄰近地區好，或者一些發達國家都係好長嘅。我諗你個問題可能係咪認為我哋嘅政策上投入多一些資源去特別為老人，可能係能夠縮短，但係唔確保真係可以去到就有得睇嘅，因為這個真係一個全球嘅問題，唔係單係澳門嘅問題。

第二個外判嘅問題我諗要交返俾張司長同李局長，因為外判服務第一個原則：法律法規嘅問題；第二個就係外判它本身嘅服務質量，因為現在政府同十幾間機構，包括了特別係澳門譬如鏡湖醫院、科技大學醫院等等嘅合作，它係有一個質量嘅保證，這個其實就係病人最關心嘅，所以這個我諗係值得去探討，即係如果要一個服務外判，這個質量嘅保證。我明白你嘅

意思係減少了輪候時間，他去到一個機構他可以好快做到檢查，亦都好快出到診斷，咁對這個老人家就能夠提供好便捷嘅服務。咁這個我諗一系列係需要研究一下，特別我諗個政策上我哋係會關心同埋去支持嘅，這個嚟施政亦都講明了，所以喺今年亦都設立了。

至於電子病歷，我相信係可以做得到嘅，因為今年我根據俾我報告，三間醫院首先會做，之後延伸，但係這個進程需要多了解，特別係私隱保護方面。但係我收到嘅就係今年係已經首先係三間醫院去做這個工作。詳細可能我哋請張司那邊俾一個書面大家參考下可能更具體化嘅資料，但係我哋好認同嘅，做電子病歷，但係最大問題係確保私隱，這個其實係好重要嘅一環嚟嘅。

**主席：**好，現在我哋休息半個小時。

**(休會)**

**主席：**好，現在我哋繼續會議，請李從正議員。

**李從正：**唔該主席。

行政長官閣下：

近年，政府積極推出一系列壓抑通脹措施，奈何受制於唔少違規行為或者唔合理行規影響，加上出現了“內需通漲”這種怪現象，喺大時大節價格倍升，又或者無合理理由亦加價、加收節日特別費等等，源頭定價、中間供貨環節被操控等等問題，導致成效未能彰顯，無助居民減輕生活負擔。面對百物騰升，政府只予人“老鼠拉龜，無從下手”嘅感覺。

廣大打工仔面對工資增長被頻頻上升嘅糧副食品及生活必需品的價格不斷蠶食，無奈只能逆來順受，生活越見困苦。

為此，請問行政長官閣下，有咩政策措施盡快推出，令到物價趨向合理，同時，促使行業中不合理、不負責任嘅環節逐步消失，達到真正平抑物價的目的？以及今年長官有無咩信心將控制通脹喺百分之幾呢？

唔該。

**行政長官崔世安：**多謝主席，多謝李從正議員嘅提問。

剛才我亦都講過，喺三月份，我哋按年通脹率係 4.95%，較二月份明顯放緩了 1.21%，係 2011 年 4 月以嚟首次按年變動率低於 5%。通脹放緩嘅原因，根據我哋有關嘅資料，係因為農曆新年影響嘅減退、旅行團收費回落，與及冬季成衣減價促銷等等原因。正如我頭先都解釋，我哋現在面對嘅係輸入性同埋內需嘅一個高速嘅經濟發展期之中，這個通脹率係比較高。喺今年裡面我哋亦都希望能夠這個通脹率，根據我睇了幾個研究都係 6% 以下，有些亦都講 5%。咁我認我哋幾個工作亦都會唔鬆懈，繼續做嘅，特別頭先李議員提到，大家廣大居民好關心嘅食品流動環節、加強市場監督，我哋亦都著力進行緊關於消費者權益嘅法律法規，嚟到係咪可以有規範食品供應市場的秩序。咁剛才亦都談及到供應商喺四月初下調生豬批發價，同時亦都比較錄得到近年較大概降幅，俾到我哋一個對整個環節裡面嘅工作嘅一個參考。我哋亦都會繼續跟進，包括我哋嘅小組，包括了法律法規。同時，對於恒常性及一次性嘅紓困措施，亦都會繼續進行。咁我哋相信貨源安全同埋喺這些整個鏈裡面嘅環節，我哋有一些經驗現在已經實行嘅，我相信我哋會著力去做多一點。因為我相信大家都好明白，輸入同內需這個通脹係有一定，但係大家其實個關心一個係消費者權益嘅保障法律法規，一個就係我哋經過一段時間小組努力，睇到喺澳門唔同嘅商店，簡單嚟講個價錢嘅浮動係好大概。咁這個我相信只能夠透過透明度，我哋及時公佈，讓廣大居民有一個選擇，因為我睇到有些貨品其實同一，它那個浮動好大，有些去到 20%，有些甚至去到 30% 唔同。咁我認這個亦都係會，但係中間環節這個，因為大家講了好耐，近期我哋其實係積極由來源、批發到零售都做了好多工作，希望通過這一次之後能夠有更大嘅進展。

多謝主席。

**主席：**鄭志強議員。

**鄭志強：**多謝主席。

行政長官閣下，各位官員，各位同事：

下午好。

行政長官閣下：

國家主席習近平上月接見長官閣下時強調，澳門可以講而家處於歷史上比較好嘅時期，希望澳門特區政府同社會各界能

夠把握當前有利時機和條件，研究解決一些制約發展的突出問題，增強憂患意識，為長遠發展能夠匡實基礎。

確實，近年喺國家系列優惠政策的支持之下，在旅遊博彩業的帶動之下，澳門經濟保持不錯的發展，但同時也衍生了不少社會問題。

為此，請問行政長官閣下：喺現階段，制約澳門發展的突出問題主要反映喺邊些哪些方面？特區政府又將點樣解決這些問題？

**行政長官崔世安：**多謝主席，多謝鄭志強委員嘅問題。

我認大家都關心到國家主席所提出這個問題同埋指導性指示。我喺這個過程之中，首先亦都要同大家介紹國家主席習近平係充分肯定了澳門特區政府嘅工作，亦都再一次表示中央對澳門發展嘅支持，特別關心到澳門處於一個比較好嘅時期，喺經濟發展、喺改善民生，同時亦都關心到我哋向前嘅問題。我認其實總結幾位領導人嘅講話同埋指示，好明確有幾點我係值得我哋喺長遠規劃裡面，特別喺明年開始去落實。我認第一，大家都知道澳門有若干嘅制約係好明顯嘅：人才、土地同埋我哋嘅經濟發展裡面博彩業所佔嘅比重，這些都係對我哋長遠持續發展有一定制約。亦都一些比較，喺這十三年特區政府嘅發展過程中，經濟取得了一定嘅發展，但係亦都係剛才鄭議員提出，可能隨住經濟發展有一系列問題出現，我哋期望這十三年所積累嘅資源同特區政府嘅經驗，更好咁去解決未來比較大家關心嘅深層次問題。

喺這裏我哋亦都唔需要迴避，我覺得亦係關心到特區政府嘅施政，一個施政水平嘅提高，一個係制度嘅建立，嚟到令到未來特區政府能夠更好、更有效服務廣大嘅澳門市民，將這些有關嘅制約能夠梳理好，同埋突出了我哋能夠發展。

另一個我相信喺人才方面係兩個關心：一個係我哋人口嘅量，一個係我哋各類人才嘅需求。頭先好多位議員都談到了人才嘅需求嘅重要性，所以我相信我哋好快就會做出一套初步嘅規劃，加大喺非高等教育、高等教育去支持澳門人，另一個亦提供一個第二機會俾過去未有機會接受非高等教育同高等教育嘅澳門人士去到進修，有利向上流動，這些講在職方面。

另一方面土地方面，大家都知道，目前其實大家都比較關心於居住需求，但係其實我哋亦都要關心於整體嘅經濟發

展。當然，國家俾了好多優惠嘅政策同支持力度俾我哋，大家亦都睇到珠三角發展改革綱要裡面明確了珠海橫琴、廣州南沙。從土地面積嚟睇，南沙嘅發展機會係相當大，因為它土地面積比較大。

咁另一方面我諗關係到特區政府這一個施政嘅水平，亦都係關係到我哋制度嘅建立，亦都係有關法律法規嘅修改同埋新嘅與時俱進係要作出提案。

咁這幾方面我覺得我哋都係需要認真檢討落實，向未來去做嘅。但係處於一個較好嘅時期，我諗亦都需要有一個居安思危，這個亦都多次領導人提出，因為特別今日好多議員都提出了我哋經濟，特別係博彩業嘅比重佔得大，這個亦都好受外來因素嘅影響，會唔會產生變化，亦都可能是一個市場亦會產生變化。所以我哋亦都需要居安思危，咁所以我哋亦都通過了法律，有財政儲備制度，咁喺過去已經執行了，現在有一定嘅儲備。咁我諗喺幾個數裡面，亦都體現到已經有一定儲備作為居安思危，喺突發事件。正如今日喺會議嘅初期梁安琪議員提出嘅傳染病問題，大家亦都經歷過喺十年前嘅非典，喺那次經濟除了我哋要保護廣大市民嘅生命健康，亦都睇到對經濟嘅影響。可能一個好短嘅時間，因為疫情嘅變化係令到澳門同鄰近地區嘅經濟深受影響。咁這些我哋亦都需要有一個防患意識，經濟產生變化嘅時候我哋亦都要保障我哋嘅基層，我哋市民嘅生活素質同埋整個澳門地區嘅穩定性。咁這個我覺得係好重要。

至於沖破制約，我相信不單係政府，亦都整個社會嘅共同努力，因為關係到人才、土地、制度等等，但係這個指出我諗係好明確實，因為發展到一定嘅階段，我哋回頭去比返同特區初初成立十三年前已經好多嘢係改變了，只能夠基於這十幾年積累嘅經濟同埋一定嘅資源，向前點樣去解決一些制約，更有一個從發展期之中喺戰略上取得更大嘅發展。這個大家其實都好共識，就係我哋嘅產業問題。喺單一產業特別佔比重強嘅時候，它有幾個影響，這個亦都係我哋睇到一些研究同埋聽到大家嘅意見。人才嘅錯配，最近我睇了三個議員嘅聯席發言，特別係關心到這一點，因為單一發展它需要好多人才，譬如而家大家都知還有幾個綜合項目將會落成，他一定會招聘大批人才，會聚返喺這些發展嘅項目。綜合嘅項目由博彩營運公司去營運，他嘅招人條件、他提出嘅就業機會係相對優於一般嘅市場，所以變了人才好易錯配，就大量投入。咁我哋點樣能夠將這一個情況俾更多機會澳門人呢？這個其實值得我哋去諗嘅。

幾個綜合項目大家都知道每一個綜合項目都要好多人它先至能夠叫做正常營運。喺個營運過程中，它還有一個發展，由初初嘅營運到它完全嘅營運亦係有一個過程。所以我諗我哋面對這個問題除了提升本地人嘅素質，提升向上流動，俾機會大家之外，所以近期我亦收到好多意見，就係我哋係用一些專才，讓澳門係一個大嘅情況下讓佢經濟成長有人才嘅配對。無了人才嘅配對可能亦都係難嘅。咁這個我覺得係值得我哋去深入喺政策性上點樣幫得到，因為大家都知道未來，我初步睇個材料，去到 2016 有多個綜合項目落成，每一個綜合項目都係投資好大嘅資源落去，所需要嘅人係真係好多，咁嘅時候會令我哋其他嘅企業、中小企好嘅人進一步拉近。所以這個係值得我哋去睇。但係，首先我覺得仲係優先次序要俾澳門人機會，同埋澳門人向上流動嘅機會，喺不足嘅情況下係咪我哋可以吸收一些專才，同埋一些已經喺澳門學習或者生活嘅專業人士，進一步能夠使到他喺澳門服務，為澳門嘅經濟發展作出貢獻，因為而家大家睇到，這個專才嘅例，我哋貿易投資促進局係有，但係你係要搵到工作，有了合同，確認你嘅專業等等之後進行申請，同另一種需要人才你俾幾多人入在每一個領域，其實係一個唔同嘅概念喺度。咁這個我覺得今日鄭議員提出這個制約，可能人才都係一個大嘅問題，特別今年未面對到，我諗到 2016 更加會突顯出嚟，所以我覺得我哋係可以未雨綢繆去謀劃一下，亦都喺唔影響本地人向上流動，唔影響本地人就業嘅情況下去帶動經濟，一齊去成長。

多謝主席。

**主席：**崔世平議員。

**崔世平：**多謝主席。

行政長官閣下：

自去年以來，內地其實多個城市受著霧霾天氣影響，空氣質素持續下降。綜合眾多言論和報導，造成霧霾和區域性空氣污染的因素好多，經濟、工商業發展，城鎮化的發達，以至氣候、風向等自然環境改變都係成因之一。

從各個渠道收到嘅民間意見，其實都覺得空氣質素這個問題亦都係我哋澳門市民所關心嘅話題，亦都係一個迫切需要解決嘅環境問題之一。特區政府過去推行了多項治理空氣污染政策，好似禁止高污染車輛進口等。但係空氣污染這個係全地區性面對嘅共同問題，既不可以單靠澳門自己獨力力量去解

決，亦都唔可能我哋自己獨善其身，區域合作、協調、共商對策係當務之急。

而家想詢問行政長官閣下，特區政府喺改善空氣質素上面將有咩部署呢？喺區域合作方面，澳門現時擔當咩角色？將來在治理空氣污染問題上，澳門與區域內各大小城市會有咩項目可以合作呢？

多謝。

**行政長官崔世安：**多謝主席，多謝崔世平議員。

我首先介紹下幾個方面：喺區域合作方面，落實粵澳合作框架協議，共建優質生活圈嘅專項規劃裡面，係有環保合作嘅項目，亦都今年加入了粵港珠江三角洲空氣質量監控網絡，實現了區域聯防聯控，就係剛才所談到嘅，因為大家都知道，空氣嘅質素同埋污染有時唔係可以澳門就係澳門咁去分別出嚟。咁亦都係澳門嘅環境保護嘅規劃 2010/2020 係會完善各項尾氣排放，尾氣排放就係最重要，我哋最關注，亦都係最大影響嘅這個檢測制度，令到能夠比較受控。環保節能基金亦都係擴展至學校，同時亦都要繼續購買環保車這個減稅鼓勵。咁其實長遠嚟講我哋亦都要符合國家減排嘅目標，嚟到作為國家嘅一部份。我諗整個從立法、從環保教育、從我們政府資源嘅支出、從區域合作，我哋都會大力咁去推動同埋工作嘅，因為而家嚟講，其實環境保護已經佔了一個城市裡面好重要嘅一個指標，亦都係關係到我哋廣大居民嘅健康問題，不只我哋這一代人，亦都關係到下一代人，所以我諗嚟明年嘅施政我哋會好重視，亦都會加強喺環保，特別係這些污染嘅問題。

多謝主席。

**主席：**何潤生議員。

**何潤生：**多謝主席。

行政長官閣下，各位官員，各位同事：

喺任何時候，有一個安身之所都係我哋老百姓最基本、最迫切嘅一個生存需求，但係面對升勢不止嘅私人樓市，居民睇唔到政府做了些乜嘢，好似無晒符。一般嘅打工仔根本就買唔起私樓，唯有寄望經濟房屋能夠解決佢哋嘅安居問題，就好像最近開售嘅我哋比喻係“雞肋”嘅一房單位，唔少急於遞交申

請嘅居民向本人表示，由於根本唔清楚政府未來幾時再接受申請，亦都唔清楚未來還有幾多經屋可以提供，因此亦都唔理無論單位面積、位置遠唔遠、交通便唔便，亦都希望有一磚半瓦在手。另外，亦都有唔少青年人同我反映，經濟房屋供應量僧多粥少，抽中之後就好似「中六合彩」，因此佢哋亦都唔管好壞，但求上樓。因此亦都睇到，喺有關一個需求方面係非常之大概，亦都睇到喺引導房地產的一個市場走向健康方向發展，同埋解決廣大我們澳門居民安居問題上，特區政府有著無可推卸的責任。

因此，亦都請問行政長官閣下，去年施政報告裡面強調要建立住屋保障長效機制，具體及實質內容係點？另外，面對居民現時強烈嘅住屋訴求，政府又有乜嘢短、中措施去確保有穩定、充足嘅經濟房屋供應量，以兌現政府一再強調嘅可以覆蓋本澳八成居民嘅這一個施政主張？

多謝。

**行政長官崔世安：**多謝主席，多謝何潤生議員所提出關心到安居嘅問題。

我今日亦都講了一部份政府嘅立場。安居其實從來都係……居有其所係特區政府呢一屆特別重視嘅工作目標，喺過去一段時間亦都做了好大量嘅工作，當然今日好多位議員提出這些係八年嘅積聚、六年嘅積聚，我哋點樣去釐清。其實簡單講就係希望我們向前望，怎樣能夠有一個清晰嘅交代。

我諗我哋再重新分析一下，安居我哋係希望解決居住嘅需求，不論係現在嘅公屋制度裡面嘅經濟房屋，大家亦都好清楚有經濟房屋嘅法律制度，社會房屋將會喺五月之後再我哋簡稱叫開隊，咁喺這個過程之中，社會房屋亦都係未有配屋嘅時候，喺一段時間我哋亦都提供津貼。政府嘅立場好清晰，大家亦都睇到建屋嘅程度。根據劉司長同我嘅介紹，亦都係請各位議員去睇過新起嘅公屋樓群，隨住這個目標繼續我哋向前。萬九之後有六千三，我哋亦都尋找緊土地，我相信遲一個階段我哋會公佈，但係我哋睇下這兩個隊嘅情況，亦都好實際，喺今年五月底，喺今年內關於社屋同經屋。

我覺得今次大家睇到這個一房一廳重開咁踴躍去攞表，其實好正常，因為咁耐我哋睇嘅資料，年青人長大了想自己有個獨立居所，不論他在學就職，符合條件攞個表，希望將來能夠得到，我覺得好正常，亦都我哋要用一個好正常、好正面嘅心

態去對他，因為經濟房屋新嘅法律制度公佈之後係好明確規範了佢哋這個所謂限制嘅條款，我如果無記錯十六年後可以賣，若干要俾返政府等等。咁既然他選擇了，我覺得他就係覺得有個需求。我自己，或者我唔係好啱，我唔覺得入了表那些人係其實無誠意去購買這個一房一廳嘅。我覺得買了之後他都可以根據個制度將來咪將來去換囉，但係因為而家有唔同嘅意見表達，我覺得佢哋係好真心實意希望有個經濟房屋，因為符合申請嘅條件，個條件大家睇到亦都係比較這些年青人可以適合。同話而家因為無樓買、樓荒，我合唔合我都要一個一房一廳，可能未必完全吻合。或者我唔啱，但我這個睇法就係覺得係有居住需求，我哋去嚟到達到這個居住需求。

五幅填海造地，大家都知道已經明確一路出緊這些填海造地嘅公開競投，2015 年我哋就會有第一幅 137 公頃嚟去落成，整個五幅我哋將會大概可以起到四萬三個單位，而且亦都多次承諾了俾大家公共設施同埋公共房屋係優先喺這些土地。這個亦是中央批給當時明確提升澳門人嘅生活質素，生活質素嘅提升，我諗安居樂業始終擺喺個重要嘅位置。但係現在嘅心理預期，同埋因為樓價嘅上升，令到很多同埋投資嘅渠道出現了希望能夠投資，所以我成日表達居住同埋投資可能係兩個市場。但係而家睇到我哋本地人亦都投入去房地產個比例一路增，這個可能其他嘅投資嘅方法可能無。我哋簡單講，而家成日同朋友一齊都講都係買磚頭穩陣，邊個一開個盤就撲埋去搵個發展商嘅已經，根本就……係有這個現象出現，我諗亦都係廣泛報導這個實際嘅情況。到底這個心理預期係咪可以大家冷靜一些呢？你經濟能力嘅負擔、息口嘅增加可能、地產市場嘅波動。其實在坐好多亦係從事地產行業，我諗經驗知識比我豐富，你睇返澳門過去四十年個地產嘅波動亦都真係有起有跌。我只係最近睇一個數據：1993 年到 2003 年大家又睇到幾多空置單位？當時嘅情況點？當然，唔可以同日而語，今天我講這些肯定批評我已經過時，但係我只係想講，個市場係波動嘅，因為它係一個供求市場，亦都係它有經濟規律，有財政規律，但係到今天係咪要一定我哋簡單講上樓呢？我又覺得未必一定。

我再睇返個數，目前批了嘅大概有萬二個單位喺私人市場，建緊嘅大概有七千，申請嘅亦都有一批，加起來大概三萬個。咁我哋當而家批了嘅、建緊嘅都接近有二萬個單位，係唔係要咁急一定要上樓呢？所以我成日認為，居住嘅需求同投資嘅需求好難混為一談，當然自由經濟體系投資亦係好合理。我好明白何潤生議員關心我哋廣大居民，特別係安居嘅問題。如果而家再出措施，我諗係兩個方面，鄰近地區亦都做嘅：一個

現存體系裡面我哋加稅，銀行抵押成數再降；另一個就係附近亦都做了嘅地區，將你個人買第二套樓房我們叫限制條款，即係稅好、銀行按揭好，每買幾多你減幾多，稅就增幾多。咁而家我哋總體嚟講睇到，我哋價升但係交收嘅量大家睇由劉司長領導嘅小組公佈措施以嚟，個量真係跌了嘅。這個交投嘅量跌了，但係個價係事實無跌，最近亦都有些升，咁變了大家可能要喺個心理，或者喺個家庭整體上要重新考慮一下去買樓，我個人認為係過熱，我亦都認為係價高，當然未必係大家認同，但係總係有一個研判。但係公共房屋嘅政策一定會落實，土地亦都同大家今日介紹了，二十八幅閒置土地，我哋行政程序已經做了，我哋唔排除可能會出現要司法程序解決，因為澳門係法治社會，完全有條件大家喺司法程序去解決，但係政府係有決心去做這個事。

咁喺土地供應、喺現實嘅投資環境，無其它好嘅投資，可能覺得始終買樓係好嘅投資，又不同的，投資同居住我諗可能仍然有一個區分。所以只能夠表達……澳人澳地我剛才亦都表達了，我哋好同意劉司已經啟動緊研究，亦都會做民調諮詢，但係這個係一個完全係公私營市場裡面嘅新概念，係點樣幫？當然未必我個理論啱，話幫夾心階層，但係它這個係離開了公屋市場，又唔買到私人市場嘅中間，咁所以簡單我哋用這個字或者詞，但係都或者未必啱嘅。咁但係喺這嚟裡面我哋特別去做，到底利弊。但係我諗有時又唔需要擔心到這五幅土地去批了其他用途，我重新喺這裏今日表明，係無批過一幅出去，都係為澳門人嘅生活素質提升，這個中央批給好明確，提升我諗離唔開安居樂業、公共設施，所以主要表達這樣，但係公共房屋政策係繼續落去，亦都唔會停嘅。

**主席：**陳美儀議員。

**陳美儀：**多謝主席。

長官，各位官員，各位同事：

行政長官喺 2013 年度施政報告中特別指出：“政府在推出政策後，因為執行力的問題，效果有時未能盡如人意”，就會話喺今年將會建立政府績效治理制度，將部門嘅執行力和執行效果、對既定政策係咪有具體而且有效嘅行動回應、政策係咪達到目標，作為評估績效的重要指標。另外就話首先會開始實行領導官員的績效評審制度。

上次施政報告到而家都已經五個月啦，咁我哋仲未睇到政

府推行績效治理制度嘅消息，事實上，例如就是話我講些例子，義字五街整治計劃，越整越少人流，好似覺得係“幫倒忙”這個情況；另外針對家庭暴力做了好多諮詢，但係又未出台，未決定；再加上青年創業貸款計劃到而家都仲未有些乜嘢聲氣；跟住環保及噪音法這些都仲係未有任何消息出台。這些種種，市民對部份政府部門係有一些怨氣，其實這些係同績效有相關，所以我想問下長官，到底績效治理制度而家進展情況係點呢？領導官員的績效評審制度又會幾時開始實施？長官閣下你對這個評審制度有乜嘢期望？你嘅目標係點樣呢？

多謝。

**行政長官崔世安：**多謝主席，多謝陳美儀議員。

建立政府績效治理制度主要其實係提升政府嘅施政方面，特區政府對這個係高度重視，所以我哋亦都擺了喺 2013 年嘅施政方針裡面，現在亦都係進行之中，所以我相信好快亦都可以出台，到時我相信亦都可以詳細介紹俾大家。

頭先亦都好關心領導官員績效嘅評審，對部門嘅組織運作、施政成效、政策目標實現程度、執行措施落實、預算執行、公共行政服務與及個人職業領導能力等綜合評審，我相信到時我哋一併可以透過主席提交文件俾大家去參閱我哋係點樣去評，因為喺施政報告裡面講今年會執行，咁我哋這個文件預備好之後，我知道政研室同有關部門已經做到接近尾聲，咁嚟到同大家介紹。我哋係重視，我哋係落實執行嘅。

咁頭先講這幾個問題，我諗義字街，大家係澳門老街坊都好明白一個過去長遠嘅問題，其實我哋最關心係個安全問題。當然今日陳議員提左，我再去關注一下係咪好似你所講咁影響了個生意咁大。至於青年那個貸款已經做好，將會好快去行政會嘅，如果無記錯，基本已經做了。仲有其他立法嘢亦按序做緊，特別係環保嘅法律，我哋希望今年年底、明年配合整個環保政策推出。

你仲有一個問題嘅我記得？家暴，係，這個容許我講多一點。因為整個諮詢過程中係出現了有分歧，亦都有一些修改。點解我會特別要講講呢？因為喺這個初期嘅諮詢裡面，我收了好多司法界朋友嘅意見，保安方面管理層嘅意見，就解釋俾我聽，澳門人其實個家庭觀念好重，他話如果你兩公婆打交，當然唔係虐待或者單方面暴力對待啦，佢哋嘅經驗，去到我們叫差館啦，俗些，如果你介入了用刑事控告他，可能破壞

了他以和為貴最後和解。佢哋俾一個反提議，最好有一個中心，中間嘅，等佢哋冷靜下，等佢哋又受到這些輔導員嘅輔導，他話其實大部份都最後……我又唔敢相信係真架，講明，只係聽啫……他話反轉另一方會求返些警察叫唔好搞告那些咁嘅嘢，但係這個我唔敢作實，只係之後我知道他們收了很多社會意見，覺得我哋澳門仲係個家庭觀念重，我無記錯開頭係用一種刑事化檢控，即係直頭告你有罪就要繩之於法這一種，但係經過一輪諮詢之後，它係出現了唔同嘅概念，即係覺得我哋澳門其實那些老公唔係真係個個都咁暴力嘅，當然我又唔可以答實這個係真定假，即係從警察方面俾我嘅意見都係以和為貴嘅最後。咁所以建議係咪將這個精神修改一下，立法嘅精神。我簡單講應該係刑事化啦，開頭，嚟到最好能夠有一個中間嘅地方，譬如一個服務中心，有輔導員，令到大家嘅情緒冷靜一下，再做一些輔導工作。咁這個我知道社會工作局佢哋做了好多工作喺這個過程。咁這個我諗如果主席同意，我哋可以提交返整個過程俾大家參閱一下。他係因為有了個改變，這個改變同開頭力趨刑事化可能有些唔同，但係我聽嘅意見可能亦都未必係全部嘅意見，我只係反映之後佢哋做了一系列跟進，似乎都比較傾向返係咪唔好即時就刑事化，要進行檢控行這個程序。咁但係詳細嘅係咪主席容許我提升一個材料俾大家去參閱一下而家個改變。所以那個同原本那個立法過程嘅時間是有了出入，係主要它有一個比較大嘅改變。我諗而家應該都基本上再經過諮詢它會定落嚟，亦都俾大家參閱一下，因為這個係社會比較大嘅問題。我完全贊同保護，但係保護嘅方式方法點樣去做呢？可能有一些商榷嘅餘地。

多謝主席。

**主席：**黃顯輝議員。

**黃顯輝：**多謝主席。

行政長官閣下：

《澳門特別行政區人口政策框架》諮詢期已於今年二月初結束，主管該諮詢工作之政策研究室透露是次公開諮詢工作反應正面和積極，將會認真研究所有意見和建議。事實上，在本年度的施政報告當中，亦載明有關部門將在上述的人口政策框架的諮詢工作完結後，認真整理和總結各界人士的意見，審慎穩妥地訂定符合澳門發展所需的人口政策。

請問行政長官閣下，相關工作有何進展？

**行政長官崔世安：**多謝主席，多謝黃顯輝議員。

陳美儀議員，我作一個補充，因為我接受了提示，其實整個案嘅精神就係，如果那個夫婦唔告，原本個立法精神就政府去告你，咁這裏就大家有個商榷。我諗我提交了文件之後大家會更清晰一些。

人口政策係大家好關心嘅，亦都係去年政府嘅政策研究室推出了澳門特別行政區人口政策嘅框架諮詢文本，經過了三個月嘅公眾諮詢，喺今年嘅二月基本完成。特區政府亦都係致力收集居民對這個政策嘅框架意見，分別舉辦了大型嘅意見收集會、小型嘅意見收集會，同媒體溝通同埋聽取大家意見。

喺整個人口框架嘅政策諮詢裡面，主要係有四個內容：一個係我哋未來嘅人口規模，一個係專才移入制度，一個係人才培養，另一個係人才回流。經過一段時間大家亦睇到，目前我哋係澳門出現最大一個問題就係承载力嘅樽頸問題。所以最近亦都係邀請了有關嘅學術研究機構有序展開關於這一個承载力樽頸嘅問題，因為人口承载力嘅計算複雜，亦都可以從唔同角度去研究。總嘅諮詢大概匯總之後，大概喺今年嘅九月下旬將會公佈，隨即亦都會做民意調查，同時最後更深入嘅研究，作為政策性嘅文件最後去公佈。

咁我哋係好重視人口嘅政策，亦都係有序咁樣進行之中。

多謝主席。

**主席：**陳偉智議員。

**陳偉智：**多謝主席。

行政長官閣下，各位同事：

行政長官一個會期嚟立法會三次，本來應該珍惜有關嘅機會，提一些問題，唔應該重覆，但係無奈舊年你十一月十四號嘅時候我問過關於《醫療事故法》立法進度問題，睇返報章嘅報導就係，你喺立法會裡面親口咁承諾會責成有關部門今年內向立法會提交法案，結果，竹籃打水，無了這個事件。

萬九公屋，2012 年底落成，又話因為不可抗嘅原因無辦法做得到。行政長官喺這裏信誓旦旦咁樣話舊年一定會責成到，結果亦都無影無蹤。就算喺施政報告裡面提出過嘅「敬師

金」，喺 2014 年嘅，但係整個過程入面有好多老嘅同事都話具體執行情況，怎樣落實措施乜嘢都無。這個行政長官本身特區政府口口聲聲話高官問責制，係咪只係話問佢制唔制？行政長官應承嘅責成，點解責極都唔成？因為這個係涉及到咩問題呢？一個態度嘅問題、一個誠信嘅問題、領導嘅問題同埋一個績效治理嘅問題。

我想趁這個機會，希望行政長官喺這裏對上述嘅問題作出一個交代？

唔該。

**行政長官崔世安：**多謝主席，多謝陳偉智議員。

我諗我分幾個去答啦。關於「敬師金」嘅問題，其實喺張司長嘅範疇，特別係教青局，係已經有序咁進行，亦都我已經同意了是在這一個計劃，同時亦都列入了今年嘅財政年度預算。根據張司俾我嘅時間表，我相信今年內係可以發得到嘅，係大概我諗九月後啦，根據我嘅資料。這個係一個。

《醫療事故法》係我上次喺立法會同大家介紹過，之後我亦都睇過委員會俾我嘅意見書，係有一些唔同嘅意見，但係我哋亦都研究了，當時係有個複雜性，全世界好多唔同國家地區亦都有唔同制度，它無統一制度，而會出現一些比較複雜嘅問題同埋需要解決嘅問題。這個唔係我去守唔守承諾嘅問題，但係我亦都係經過我哋研究，我哋依然係會提交《醫療事故法》，我相信喺今年十月以後復會，這個因為已經經過長時間嘅諮詢，亦都確定了我哋嘅工作方向，這個亦都係包括了我哋係用這個有責任……我哋用有責任嘅賠償，唔係用無責任嘅賠償。係本身它存在嘅複雜，同埋它需要得到共識嚟推行。咁我亦都只能夠講，我哋係會今年去提交這個《醫療事故法》遞交俾立法會嘅。

**主席：**吳國昌議員。

**吳國昌：**特區政府八年停止接受申請經濟房屋，令到有需要市民深受壓抑。特首你知唔知道，而家到今日唔少市民好期望政府立即著手將已經決定收回嘅機場裡面十三幅一大片曾經號稱「御海南灣」嘅住宅地能夠正式規劃，興建經濟房屋，那裏應該可以提供超過五十萬平方米嘅住宅樓面面積。

展望將來，我哋睇下調查，今年四月，澳門社會科學學會

發表「青年人應對社會變遷」嘅調查報告，具體報告顯示我哋澳門年青人重視留澳成家置業：82.2%年青人表示會申請經濟房屋，而正在攻讀大學那批受訪年青人更加有 91.7%表示會申請經濟房屋。

喺咁嘅情況之下，長遠嘅、長效嘅房屋發展機制最為重要。咁特首今日都講過一些，所以我喺這裏正式睇下，今年可以有咩進展？例如係咪可以正式設立房屋發展基金，將過億嘅經濟房屋收入撥入去就可以支援將來嘅發展。新城填海澳人澳地今年可唔可以有初步嘅研究方案拎出嚟公開諮詢？劉司長既然收到初步研究，一些成果可唔可以都提供俾我同政府分憂，睇下面對咩隱憂。至於基層市民同夾心階層去面對分享經濟成果，我覺得完全可以喺新城填海澳人澳地不同嘅方式澳人澳地嘅規劃裡面可以絕對達到基層夾心市民能夠平均咁分享這個置業嘅需要。我希望能夠擺到資料分享到政府初步成果。

**行政長官崔世安：**多謝主席，多謝吳國昌議員。

我諗我分幾個方面回答。關於澳人澳地嘅研究，劉司長係聘了兩間學術機構，亦都進行緊，我諗這個如果有研究嘅初步成果，亦都可以同大家去分享，因為事實一個新嘅政策，亦都係一個新嘅事物喺我哋嚟講。

至於剛才提到有關偉龍馬路嘅土地，其實特區政府係基於終審法院嘅裁決，政府亦都已經依法宣告有關 2011 年批准修改土地批給嘅行為無效，喺日前亦都完成了相關公佈及登記程序，而家我哋係按這個法律收回這個土地，咁我諗亦都公佈了。但係我哋亦都需要聽取了法律意見之後，需要一段時間辦理，然後亦都有可能進入司法程序，所以我哋亦都會觀察住點樣做。但係喺未完成這些程序前，我相信劉司，包括我，亦都係好難去表明已經下一個用途，但係可以喺度承諾，我哋如果個土地係政府嘅，當然係以澳門居民公眾利益為依歸，這個亦可以表得明，但係今日咁樣一定要表白話即刻起公屋嘅，我諗我又唔具備這個條件去答應。剛才我亦都講得好清楚，包括閒置土地、收回嘅土地、包括了填海造地嘅土地去建公屋，其實係一個優先次序，這個唔係今日講，亦都係多次承諾去講嘅。所以我諗可以放心，因為大家都睇到填海造地有一個時間表。

至於澳人澳地，我知道吳議員亦好關心，亦都去傾過，我今日亦都將我收到嘅意見同埋而家進行嘅有序情況同大家介紹，因為我知道你係好關心係咪我哋會批了些地唔符合澳人嘅

利益。咁我可以好明確同你講，根本我哋無批過這些地，關於五幅填海嘅任何用地出去，我哋一定會跟中央這個批給，係為澳門人提高他的生活素質，當時喺規劃我哋亦都係以公共房屋、公共設施作為優先嘅，因為我哋有好多公共設施可能需要增加。咁但係澳人澳地其實大家好關心係因為而家這個市場，大家好關心係希望能夠有一些為澳門人這個階層，譬如吳議員你剛才講，我覺得無問題嘅，這個階層。咁其實我哋亦透過諮詢或者聽取其他人嘅意見係咪有問題呢？我覺得亦都好合理，因為有時間，已經啟動了研究，有時間，包括民調好，包括聽取意見好。

咁這個我諗可以放心，亦都係會跟進去做。今日亦都講了好多關於公屋政府嘅立場，所以我相信澳人澳地反而同公屋唔同，係真係值得整個社會，我哋所講嘅公眾去討論一下係點樣。因為它亦都關係到有若干界定，因為始終係個限制條款，你係俾澳門人購買嘅房屋，俾澳門人住，譬如將來嘅轉售，將來嘅居住等等，可能都係一系列問題，我哋面對可能要新嘅法律法規，雖然我知道《土地法》我哋亦都會關注這個問題，但係你亦都係一個新嘅法律法規，同時我哋亦都需要真係廣泛去聽取一下意見，所以研究同諮詢我覺得係有需要，而且我哋委託了學術機構去做，我覺得會好客觀去睇這個問題。但係提出了這個澳人澳地之後，事實係好多嘅公眾討論，我哋亦都收了好多意見。我今日將我收到意見嘅利同弊亦都同大家介紹一下，這個亦都未必係一個準嘅，可能我哋諮詢之後更多嘅意見，或者到時亦都要從個政策性或者從個法律法規方面點先能夠符合，但係個方向我係好明嘅，我哋有些唔符合公屋，但又買唔到私樓，希望澳門人能夠有一個心理上、實際上好一個預期嘅希望，令到整個市場有一個健康，這個其實好贊成，亦都我睇到現在這個階段無乜嘢大家唔同嘅意見，但係概念到實際落實，到去政策措施執行，我相信仍然可以要聽取好多唔同嘅意見，這個我認為現在這個推進亦係適合，因為由施政開始提出到現在亦都係大家做緊唔同嘅工作，聽取了好多唔同意見，而且我哋嘅填海造地第一幅將會係 2015 就完成，到時如果這個計劃係落實嘅，我相信都配合得到。大家最關心嘅係土地使用嘅問題，亦都今日係表明了這個方向。

**主席：**區錦新議員。

**區錦新：**多謝主席。

特首閣下：

好多市民知道今日特首會嚟立法會，睇到經常因為物價飛漲，個個都問特首個現金分享幾時開始咁樣。我叫些市民今日睇電視啦，特首一定會講架啦。我就無準備問嘅，照計特首有機會應該會宣示一下現金分享幾時開始。

我會問些我認為比較關注些問題：公共房屋係一個社會嘅焦點，而家可以講係一個尖銳嘅矛盾。行政長官閣下去年底發表施政報告時明確宣示今年第一季度重開社屋、經屋登記。之後亦都是記者會上表示了要透過新一輪經屋登記掌握社會對經屋的需求數量，要全面掌握到這個社會對經屋需要嘅需求數量，先至能夠開展到經屋計劃。但係而家好清楚，嚟到這裏嘅時候，特首嘅承諾，但係去到司長同房屋局局長就明顯打了個大折扣，經屋得返一些買剩嘅一房一廳嚟登記，而社屋都延遲到五月份先開始登記。

當然剛才特首已經就這件事向公眾致歉，但係作為政府嚟講，簡單致歉係唔足夠嘅，而且應該向公眾交代承諾點解能夠兌現。究竟係閣下無顧實情胡亂發號司令呀，還是係運輸工務司司長或者房屋局局長抗拒命令不執行呢？令到閣下難堪呢？我覺得喺這個機會都應該係透過答問大會上向公眾宣示一下，解釋清楚。

多謝。

**行政長官崔世安：**多謝主席，多謝區錦新議員。

我諗你嘅問題我亦都借今次去回答一下係一個好嘅時間。我哋制定施政方針，其實係每一位司長同他管轄下嘅每個局長經過詳細討論研究，根據實際情況。咁亦都係我同每一位司長同他管轄局長大家亦有開過好多次會，特別係同司長，所以制定裡面係唔存在唔統一嘅。但係我今日已經表達了，房屋局亦都係早幾天表達了佢哋延誤嘅原因，同時亦都表達了喺五月經濟房屋開返隊去接受申請。我諗喺這個過程中唔存在這個問題，但係我哋亦都承認了存在延誤嘅問題。我諗好嘅管理仲係要面對問題嚟到去處理，咁亦都係處理了。

至於大家其實不斷問到可唔可以快些，譬如去點掌握，我諗其實亦都係通過今年一房一廳好、社屋好、經屋好，進一步匯總分析之後，是會掌握到，大家亦都會睇到個數據向前，所以這個我諗亦都唔存在政府會隱瞞或者任何對這些數據。總嘅嚟講，喺這個重嘅工作量裡面，亦都係需要事實去解決這些問題。我覺得，第一係唔存在唔統一亂咁發佈，因為這個係令到

市民更加無所適從。我哋重申今日這個表達亦都係明確，延誤了，房屋局亦都解釋了原因，咁我哋亦都盡快喺五月開返隊，這個亦都係實事求是，希望能夠掌握返這個登記。

多謝主席。

**主席：**唐曉晴議員。

**唐曉晴：**多謝主席。

行政長官閣下：

澳門大學橫琴校區即將竣工，估計不久就會正式啓用，到校區啟用，可以預見到時有大量師生與職工會往來澳門、氹仔及橫琴上學上班。根據公開資料估計，未來澳門大學嘅學生應該會有近萬人，有一部份人會住宿舍，但是唔住宿舍嘅學生同職工其實都係唔少嘅。交通事務局初步計劃喺橫琴校區設兩條巴士線。

對於這個安排，好多我們澳大師生和職工都擔心將來這一個交通配置能唔能夠解決咁多人上學上班嘅問題呢？而且仲有我哋那一邊係有賭場，將來經濟房屋會啟用。請想問一問特首對於這個咁嘅情況有無一些計劃？

**行政長官崔世安：**多謝主席，多謝唐曉晴嘅問題。

我諗大家都好關心澳門橫琴新校區現在基本建成，整個完全搬遷至到九月正式嚟新校區運作嘅情況。我相信特別係負責嘅有關部門對這些交通嘅安排、安全，我知道亦都消防局設置了專站等等，有一系列配套，但係可能我唔喺一個位置去評估這些巴士線夠唔夠，我諗我轉俾劉司長下面部門同大學再研究一下到底夠唔夠。我諗我哋其實那個設計同工作係好清晰嘅，因為大學係希望達到有一萬個學生，同時亦都報了有工作人員、師生等等，整個交通配套，特別關係到安全，我知道佢哋亦都開過好多次會，但係細則我真係唔掌握，這些巴士線係點樣去處理，但係我轉俾劉司再研究。我好明白唐議員就係擔心這些巴士嘅接駁同埋提供公交線嘅輻射網絡能唔能夠負擔得起咁大批師生，亦都係一個新嘅計劃，因為它從個隧道去到橫琴新校區，這個我會關心一下，因為前一段時間我哋聽了關於安全嘅報告，特別譬如消防、管理等等，但係我諗這些公共交通嘅公交路線，我相信係重要嘅，我同意，但係點樣能夠滿足到，這個亦係需要提供這個服務嘅保證。我會轉俾劉司長再同

大學有關方面嚟到去處理關於特別係公交嘅問題。

**主席：**陳澤武議員。

**陳澤武：**多謝主席。

行政長官閣下：

近日，口岸通關工作在特區政府和內地各方面的努力和通力合作下，有了突破性進展，延長通關時間，便利了澳門居民和訪客。

隨著內地輕軌、高鐵各路段的投入使用，珠澳口岸日趨繁忙，常規化延長通關時間是需要的。

在清明節三天當局進行了特別措施，延長通關時間，我想請問行政長官閣下，珠澳兩地口岸及相關部門有無就上述試行方案進行研究分析和總結，有何利弊呢？同時，上述臨時措施幾時有條件可以作為恆常措施？

多謝！

**行政長官崔世安：**多謝主席，多謝陳澤武議員嘅提問。

喺國家口岸管理辦公室、公安部、海關總處、國家質檢總局等中央部門關懷下，亦與同廣東省珠海市政府大家聯合部署下，大家睇過上一次清明節這幾天嘅延長通關時間。我知道廣大市民，特別兩地居民亦都好希望能夠假日、節日，以至平日都能夠有延長通關時間，最後去到二十四小時通關。喺這個過程之中，我哋亦都檢討了，亦都大家覺得非常有利，同時亦期待下一個節日。但喺整體情況嚟講，大家都知道，澳門特區長期與廣東都係希望爭取延長通關，最後二十四小時通關，這個不單喺拱北，亦喺橫琴口岸。咁這個亦都大家睇過係粵澳合作框架協議裡面係有細則明確，同時我哋是希望亦都是分線管理。咁這個同廣東係聯署繼續向中央提出要求，亦都希望恆常化達至這個目的。這個我哋會不斷爭取嘅，但係我相信有關部委亦係人員編制、財政這些方面需要得到批覆，我哋會繼續去爭取，因為這個對於無論將來發展橫琴，以至到整個區域合作係好重要嘅，因為現在橫琴已經出了產業目錄，我哋亦都係等緊優惠嘅政策，但喺這個整個配套裡面，我哋覺得其實這個通關便利係其中一個重要嘅一環，包括了延長通關時間至二十四小時通關，亦都係包括了我哋好關心嘅分線管理，所以總結

今次嘅特別措施係有利，我哋亦都會繼續爭取希望能夠早日實現延長通關以至到二十四小時，對整個區域發展、對我哋去橫琴係相信一個好需要我哋要得到批覆嘅工作，我哋一定會努力繼續嘅。

**主席：**吳在權議員。

**吳在權：**多謝主席。

尊敬的行政長官崔世安閣下：

國家主席習近平提出“中國夢”。澳門作為中國的一部分，當然亦都應該要參加中國夢的奮鬥之中。

我哋澳門回歸後的經濟確實發展取得唔少成績，但同時亦都帶來深層次問題。例如貧富懸殊差距拉大，產業結構不平衡，各行各業專業認證未能落實等等。多種因素令到社會，尤其是青年人對社會是感到有不公，對自己前途迷茫，亦都缺乏信心等。因此，值得關注這與建設中國夢是否相符呢？

綜合上述因素，本人想向行政長官閣下去提問一下：

會點樣加強行政及法制改革，著令提升政策施政水平？有咩政策能夠真正創設產業結構多元，減低貧富懸殊差距，維護社會和諧？亦都想聽聽長官講出，到底幾時至能夠正式推動各行各業的專業認證制度建設呢？因為你喺今年 2013 施政裡面講出是“繼續推動專業認證制度的建設”。所以有咩政策措施，去創造更多機會空間，使到青年人能夠明晰自己嘅前景，增強信心，積極向上流動，規劃美好人生，為完成個人夢想而努力，為更好的承前啓後建設和諧澳門，為配合國家主席習近平提出的中國夢而努力，亦都係長官提出了要培養人才嘅一個核心。

多謝。

**行政長官崔世安：**多謝劉主席，多謝吳在權議員。

我認澳門作為國家嘅一部份，同樣係要為這個中國夢而奮鬥，亦都順應國家發展嘅大勢，立足於本地發展嘅藍圖。我哋好清晰習主席所提出嘅中國夢強調了民族精神同埋時代精神，我哋亦係希望澳門特別行政區為國家嘅建設共同努力，這個肯定係一個共同嘅夢希望能夠實現。

剛才提到幾個問題，有些我喺前段講了，有些亦都我再講一下。我好明白吳在權議員關心到特區政府，特別係這個制度嘅建設，同埋有一些特別係你關心嘅法律法規嘅推行、提案等等，我哋一定會繼續努力去做，特別關係到專業方面，我諗這個係必須喺今年下半年最好係能夠有幾個比較成熟，目前我哋係醫療專業人才、工程專業人才，亦都研究了一段時間社會工作嘅專業人才，這幾方面我哋係會落實咁去做。我而家可能未記清好多專業制度，但係這幾個我知道係進行緊，我哋亦都會落力去做嘅，所以這個請你放心。

多謝主席。

**主席：**馮志強議員。

**馮志強：**多謝主席。

行政長官閣下：

去年十一月，習近平總書記提出實現中華民族偉大復興，這是中華民族近代以來最偉大的夢想。中國夢成為了一個熱門話題，“圓夢”也成為今年兩會關鍵之詞，圓中國夢已成為社會熱點和奮鬥目標。請問行政長官，閣下有沒有一個澳門夢？如果有，這個澳門夢是什麼？閣下準備怎樣去圓這個澳門夢？

多謝。

**行政長官崔世安：**多謝主席，多謝馮志強議員嘅問題。

我諗大家都近期好關心習近平總書記提出嘅實現中華民族偉大復興嘅中國夢，澳門作為中國嘅一部份，作為一個特別行政區，係理應一同去圓夢，正如剛才閣下所講，亦都係好需要參加國家嘅建設嚟到達成這個圓夢。我覺得這個中國夢亦係每一個中國人為國家嘅發展、為國家嘅主權、為國家嘅安全嘅根本利益是要出發而努力去奮鬥。

你講到澳門同埋你問到我，我諗其實一個好好機會俾我講下。我諗澳門人其實長期都係愛國家愛澳門，對於國家希望嘅

民族復興嘅偉大中國夢基本一致，作為中國人嘅尊嚴同榮耀亦都係一致嘅。但係澳門人，我自己覺得，當然未必一定是大家都咁覺得，其實長期係一個比較和諧嘅社會，好重視家庭，特別係親情同友情，而我諗相信大家都好明白，我哋在座各位議員都喺澳門經歷過一段時間，亦睇到澳門發展嘅過程。喺澳門現在嘅發展過程中，你問到我，我覺得喺進度裡面大家體現了個社會係喺個民主進程中有好多唔同嘅聲音同過去不同。我覺得作為一個特首好，作為我們官員好，係應該勇於面對問題同埋接受批評。這個係通過交流，亦都可能係交鋒，到最後可能達到一些共識，令到整個社會和諧。

但係澳門人我自己覺得其實除了愛國愛澳嘅心好強，凝聚一個和諧社會力量，其實亦都所要求嘅都係安居樂業、來到有好嘅教育制度，特別為一代一代，下一代嘅人，同埋最後退休嘅保障，包括了退休金額同埋醫療制度，基本就係我自己覺得我長期接觸澳門人基本自己嘅理想同信念。但係我自己嚟講，因為特別今日馮議員問到，咁你有無呢？咁我話，我諗夢就個個都有嘅，因為我哋亦都睇到澳門好重視家庭觀念，特別我最近睇了一個學會嘅研究，談到青年人對家庭觀念嘅重視，我好相信這個哲學信念係源自儒家思想，特別係仁義禮智信方面。所以這個咁好嘅優良傳統，既愛國愛澳，亦對家庭咁重視，其實我哋應該珍惜同埋每一代咁相傳。至於問到我自己希望點樣，同埋個夢點。我諗作為一個喺特別行政區成立有機會出任了十年司長，到今日已經做了三年行政長官，我覺得這個係我好寶貴嘅機會，亦都好珍惜去工作。當然，好多工作可能亦都未能夠完善，人無完人，亦都喺人嘅工作過程中，特別係行政，我相信錯漏疏忽每個人都會有，這個亦都包括我自己。但我好希望我完成了我嘅任期，大家會覺得我哋係同廣大市民嘅服務同努力係為澳門向前。

在未來嘅歷史評價，我亦好希望能夠回顧第三任行政長官，他係一個努力工作向前嘅。我總係覺得，無事事如人意，但求無愧於心，就我自己希望完成工作，亦係自己嘅夢，但係我諗大家生活了澳門咁多年，大家一個咁和諧嘅社會，大家都會經歷一個人嘅過程，生老病死，生離死別，但是喺這個小社會裡面，我哋嘅人際關係出現，特別係鄰居關係嘅關心支持，這個我覺得澳門係好可貴。當然而家好多新嘅事物發生，本身它發展成為一個面向國際化嘅城市，它亦都發展了好多我哋過去可能嘅改變，但我覺得整體嘅澳門，從近期我哋嘅觀察，從自己嘅體會，依然係好重視家庭，這個我覺得係好值得我哋去珍惜嘅。咁我亦都好希望我同我嘅團隊能夠根據我

咁施政繼續努力去完成這個任期。我哋好明白，喺一個民主進步社會，去接受批評，亦都應該面對問題，但係總嘅嚟講我覺得，無論議會議員好，政府官員好，其實大家都係落實一國兩制去建立更美好嘅澳門，所以我諗喺這個共同目標上，大家都能夠向前。

多謝主席。

**主席：**好多謝行政長官回答了二十四位議員嘅提問，亦多謝各位官員列席今日嘅會議。今日嘅行政長官答問大會到此結束，多謝大家。

**翻譯：**翻譯辦公室

**文牘：**紀錄及編輯辦公室

